

AÑ CARTA ÑEÑT HEBREONESHACOP HEBREOS

*Te'ña Yompor Puechemerpa' ña e'ñe
ye'ñorana'terraya ñeñt atet oteñ Pompor yocop*

¹ E'ñe ahuatoteñ Yomporñapa' chocma eñorana'tyesane't ñeñt pueyochresha' pe't ñeñtcha' a'mta'yesaye't po'ñoñ ñeñtara profetanesha'. E'ñe pa'namenot eñotatyesanete't. Ñetñapa' o'ch eñotatenmayet yatañneshañ judionesha' ñeñt atet otenanet Yompor. ² Tarraña te'ña yapa' e'ñe ña Puechemer o' eñorana'terraya ñeñt atet eñoreññaña Yompor yocop. Ñehua, ñeñtpa' ñeñtara Puechemer ñeñt Jesucristotets ñeñt ne't Pompor ahuatoteñ, ñach o'patenaya allohuen ñeñt ora allpon eñall, tarro'mar ña ye'chcataprete' ahuat Pompor añ patser ñaña allohuen ñeñt esocmañen pa'namen eñalleyesta.

³ Ñeñtara Cristo atto atarr cohuentena ña pa'tsnomueño't, ñeñtpa' Pomporña orrtaten po'partsoña. Ñeñt atet cohuen orrtatyen ñapa', Pomporpa'cho'ña e'ñe parro attecmuet. Ñapa' e'ñe po'ñoñoña orrtatuan ora esocmañen ñeñt allpon pa'namen eñall tarro'mar ña po'ñoñpa' atarr huomenc. Ñeñtara ñeñt rromats attoch e'ñe e'shampesuerrey yo'chñar. Allempoña o' orrtatuan atto e'shamperrey yo'chñar allempoñapa' o' alla anorruerr Pompor Parets

po'cohuenrot allña atarr partsotapretuerrana
Pompopor po'conaño e'ñe all pue'ntaño.

*Ñeñt Yompor Puechemerpa' ña metana'tuene' al-
lohuen mellañoñeñnanesha' atto atarr sherben ña*

⁴Ñeñto'marña te'ña ñapa' atarr añcha'tarettena,
ello metana'tuenan allohuen mellañoñeñnanesha',
tarro'mar ñapa' ñeñt otenet ñapa' e'ñe Parets
Puechemer. Ñeñtña mellañoñeñnanesha' ñetpa'
ama atteye' otaretteneto. ⁵Ñaña yeñoteñ
ñapa' ña e'ñe metana'tuenahuet tarro'mar
mellañoñeñnanesha' ama't pueñeñarroñetapa' ama
otaneto ñeñt atet otan Puechemer, ñeñtapa' atet ot
Puechemerecop:

Papa' pa ñeñtep e'ñe Nechemerep, te'ñapa' o'ch
e'ñe neñotach acheñenesha' po'ñoçh papa'
e'ñe Nechemer nepenep.

Po'pocheñoña' atet oterrerr Puechemerecop:

Napa' na ñeñten Pomporen, ñapa' no Nechemer.

⁶Po'pocheñoña allempo chapatan Puechemer
po'moter ñeñt atarr nanac sherbets añe patsro
atet eñora ñocop, ñeñtapa' atet ot:

Te'pa' concorpana'teñepa'ch allohuen
nemllañoñeñnaneschar.

⁷Po'mllañoñeñnaneschar ñetpa' añeçpa anarettenet
ñetcha' sherbenet Yompor. Ñeñto'marña atet
eñorena ñocpuet:

Ñerra'm erra nemñayenanet e'ñech poma'yorñecma
erra senet e'ñe atet penet ñerra'm mōrr.
Atarr cohuen sherbennet atet ñerra'mrrate'
tso' ñeñt atarr cohuen huoretyets.

⁸Tarraña Puechemerecoppa' ama atteye' oteno.
Ñocoppa' atet eñora:

Papa' atarr Partsoř, ñeñteřcha' čhocma
amicha'tarettetsa peconaño ñeñt
errponañohuen. Ñaĩa ñeñt atto
řa'micha'tarettena řapa' e'ñe pocte' es
peřa'yenanet.

9 Ñaĩa ñeñt e'ñe pocte' nenten napa' ñeñtña
atarr řocshatene'. Ñaĩa ñeñt ama poct-
eye' nenteno napa', řapa'čo'ña ñeñt atarr
petsena'ten. Ñeñto'mar napa' ñeñten Pey-
omporer pepenen, ahuo't atarr nanac noc-
shaterreř. Atto atarr řocshena řapa' ello
penřtana'tueñ allohuen po'potantañ ñeñt
nesherřa'yene' ñamet.

10 Yomporpa' alla eñorerrerr Puechemerecop,
ñeñřpa' atet otererr:

Partseshacha' řa yečcatue' ahuař pats, e'ñe
echarr řorratue. Enetpa'čo'ña e'ñe
pehuamencotecma peyečcatue.

11 Ñeñt e'ñe peyečcatuapa' ñeñřpa' huañerrcha'
e'ñech chenca'huerra esempo, țarraña
řapa' ama arromñařeshayaype ama't e'ñe
errponaña. Allohuen ñeñt peyečcatua
ñeñřpa' e'ñech mellasha'tua e'ñech atet
pena ñerra'mrrate' shetamuets ñeñt atarr
amllasha'tña.

12 Atetřha' peperr peyečcatar atet ñerra'mrrate'
shetamtsoshe'm ñeñt o' mellasha't. O'ch
ametatse'chet o'ch huapore'chet allempo
chorrenet po'poñ ñeñt atarr cohuen emarr.
Tarraña řapa' atterapach errponañohuen.
Atto řocrrena řapa' ama't ahuařapa' amach
ahuañañařterro.

13 Po'pocheño Yomporpa' alla oterranerr Puechemer, ñeñpa' atet och:

Te'pa' o'ch alla panorruerr arr necohuenrot allcha' pepartsotapretuerrna. Esemposhuañencha' allohuen ñeñt pe'moñe'tene' o'ch e'ñe na'mchechueranet attochña pomnaren peḡohueranet.

Tarraña mellañoṭeñnanesha'ñapa' ama atteye' oche ñeñt atet otan Puechemer. (Ñeñto'mar yeñoteñ Yompor Puechemer ña atarr sherbets, ello metana'tuenan allohuen mellañoṭeñnanesha'.)

14 Yeñoteñ allohuen mellañoṭeñnanesha'pa' añecpa allsensareṭtenet atet ñerra'm Yompor Puecamquëñ, ñetcha' sherbenet Yompor. Attochña ñetcha' yenpuenet allohuen ñeñtcha' a'qeshḡatareṭterrtsa.

2

Amach atta es yepchatsto esheccha' ya'qeshḡatareṭterra

¹ Te'pa' atto o' yeñoterrñañ Yompor Puechemer atto atarr nanac partsoten ñeñto'marepa'chña te'pa' elloch yema'yoçhrerra o'ch ye'mñoter e'ñe poctacma ñeñt atto o' ye'muerrñañ po'ñoñ. Ye'mñoterrepa'chña e'ñe cohuen te't acoḡoteñpa' ñato'rraña o'te' alla yepserrñañ ñeñt atet o' yeçaterrey Yompor Puechemer. ² Tarro'mar yeñoteñ Yomporpa' ama puenesho po'ñoñ ñeñt atto eñorana'tanet ahuat. Tarro'mar allempo ñeñt ama e'mñotaye ñeñt atta atpare'te'pa' e'ñe tsa'tatuanete't allohuen ñeñt allpon e'ñe pocte' ent ña. Ama't añ ñoñets ñeñt orrtat

po'millañoñerensha' chocma tsa'tatanete't
ñerra'm esempo atpare'tenet ñeñt' ñoñets.
3 Ñeñto'marña yapa' yeñoteñ ñerra'm ama
ye'mñoterrñañe e'ñe ña Puechemer, yañapa'
errotenuachñaca'yeña yequeshperrate'ña
ñerra'm atta ama es yepcheno; e'ñe atta
eñalleñca'yeña attoch ya'queshpataretterrañ e'ñe
cohuen. Ñehua, ñenmatpa' Yepartseshar Jesúsña
serrpare'tatahuet attoch ya'queshpataretterra.
Allempoña ñeñt' e'muene' atet otanet Yepartseshar
Jesús, ñetñapa' o' serrpare'tatyet yaña attoch
yeñoñ ñeñt' e'ñe po'noñ ña a'queshpatañtetsa.
4 Ñaña Pomporñapa' ñaña yeñotate' Puechemer
po'ñoñ ñeñt' atet oteneypa' e'ñe po'ñoñ. Ñapa'
orrtatyesanet po'partsoña ñaña po'huamenc
ñeñt' acheñenesha'pa' ama puentareto. Ñaña
ña Puecamquëñoñpa' o' apa'yesey e'ñe
puesheña'ttsoy errotencha' muenatey ña ñeñt'cha'
atet yetorra'yesa ñocop.

*Atto Jesucristopa' e'ñe poctacma acheñetos arr
patsro attoña e'ñe pa'mo'nasheñ pohuerrey*

5 Te'pa' o'ch noterrserr po'poñoneñ añ patser
ñeñt'cha' huerrtsa tsapañoneñ. Ñeñt'pa' ama
mellañoñerenshaye' noña Yompor ñeñt'cha'
pomnaren perre'. Ñapa' aña na' acheñ ñeñt'pa'
arromñatenesha'. 6 Tarro'mar atet anaret Yompor
po'ñoñ ahuañoteñ allempo puesheñaripa' atet otan
Yompor:

Ama't acheñaya ama't mamesha ama
esoyayye, tarraña pa Nomporepa'
atarrepa't peyerpuenya. Ama't ya

ñeñtey arromñațena'taraya țarraña Ƥa
Nomporepa' atarrepa't pemuerenya.

7 Ñeñț arromñațenesha'pa' ama tama
ahuamencateyayeto atet atarr sherben
mellañoțeñnanesha'. Tarraña ñeñțpa'
mamecpa atet pemnach. Tarraña ama't
atteñpa' elloña o'ch alla pecohuentater atet
ñerra'mrrate' esempo o'ch net ñeñțcha'
añcha'tarețterrtsa, allempopa' o'ch nachtet
po'choyo'mñ ñeñț atarr cohuen.

8 Ñeñțpa' țarro'marña atet pene' arromñațena'tar
allochñapa' attoch e'ñe pomnaren penan al-
lohuen ñeñț allpon es peyeçhcatua. Ar-
rpa' allohua atet oten ñoñets ñeñț ahuațoteñ
anareț.

Ñehua, ñeñț ñoñets all oten arromñațena'tar
ñeñțcha' e'ñe pomnaren perre' allohuen, ñeñțpa'
añca'yeña oteney allohuenacop ñeñț erraƤaren
eñall; amach eñalleña ama't e'ñe patrra ñeñțcha'
ama pomnaren perreto. Tarraña ama't atet
oteneñ ñeñțpa' amaña yentera' allempoch
pomnaren es perr arromñațena'tar, țarro'mar
ama çherra' allempoch etsoterra ñeñțecop
anareț. ⁹ Tarraña e'ñe yeñoteñ puesheñarr
ñeñț arromñațecoptartostsa ñeñț atet Ƥostsa
ñeñțca'yeña Jesús. Allempo acheñetos arr
patsro Pomporña muenate' amach tama
ahuamencattoso atet atarr ahuamencattena
mellañoțeñnanesha'. Tarraña ñeñțpa' mamecpa
atet muenach attoch e'ñe arromñațecoptartosa
arr patsro. Ñeñțpa' añecopña atet Ƥa attoch
mueroçhtosa o'ch rromos allohuenacpay ñeñtey

arromñatenesha'. Yompor e'ñe puemuereñoŕey ya atfoña muenatan Puechemer o'ch rroma yocop. Ñeño'marña Pomporpa' o' alla atarr cohuentaterran Puechemer allempo o' alla ner ñeñtcha' atarr añcha'tareŕterrtsa.

10 Ñehua, Yomporpa' yeŕhcatan allohuen ñeñt eñalleyetsa. Ñaña allohuenpa' tarro'mar yeŕhcatue attoch cohuentateññañet ña. Ñaña ñapa' añ muenen shonte' ñeñtcha' e'ñe puechemerasha' perr ñeñtcha' cohuentapreŕerraya ña. Yomporpa' e'ñe pocte' enteñ o'ch muenatan Puechemer attoch mueroŕtateñ acheñenesha'. Attochña e'ñe etsotatoñ Puechemer esheccha' a'quesŕpaterran allohuen ñeñtcha' puechemerasha' perr; attochña e'ñe ahuanerranet allcha' cohuentapreŕerrñañet Pompor. 11 Ñehua, Puechemer ñeñt Jesús, ñapa' a'cohuentatan acheñenesha' Partsocop, atfoña e'ñe e'shañpesuanet po'chñar. Te'ña ñeñŕey a'cohuentatuareŕey ñaña ñeñt ya'cohuentaterre' ñeñtpa' ñeñtña e'ñe ñeñtena'tarecmay tarro'mar ñeñtara Yompor yepen ñeñt Pompor pen ña. Ñeño'marña Jesúsŕa' ama puepencñoŕey'e' pa'mo'nasheñ penye. 12 Yeñoteñ ama penquënyo tarro'mar Yompor po'ñoñ ñeñt anareŕ ahuatoteñ ñeñtpa' atet oten ñerra'mrrate' Puechemer otets:

Napa' neserrpare'tachcha' nemo'nasheñnesha' atet e'ñe cohuenare' es peŕa'yen pa. E'ñe naŕhoteñoŕeŕ paŕa' ŕhocmach na'ye'choŕtatonapŕ all apŕhena allohuen masheñneshaŕhno.

13 Yompor po'ñoñ ñeñt aquellcareŕpa' atet oterrerr

ñerra'mrrate' Cristo o' alla oterrerr:

Napa'cho'ña neyemteña Yompor.

Ñaña atet oterrerr Cristo:

Te' arro'tsenen epan Nomp por puechemerasha'
ñeñt' cohuanpsatenen ña.

14 Ñehua, allohuen ñeñt' e'ñe pa'mo'nasheñecmuet p'annetsa, ñetpa' e'ñe ñeñt'ena'tarecmuet. Ñeñto'marña Jesús pa' e'ñe acheñetos attoch pa'mo'nasheñ posey. E'ñe arromñatena'tartosa e'ñe atet ñerra'mrrate' ya. Ñapa' tarro'marña atet p'osa allochñapa' attoch rromos. Tarro'mar allempo rromapa' attoña puerratañpesuan oneñet po'huamenc atto atarr añcha'nochtana'teney allempo yerromuen.

15 Ñeñtpa' Jesúsña a'huañatañpesuose' ñeñt' ama't cheshoteñ chocmach yencha'ten atto yerromuen, ñeñtpa' atarr añcha'nochen yenteñ.

16 Ñehua, yeñoteñ ama mellañoñeñnaneshaye' llequënoña Jesús ñeñt'cha' yenpos arr patsro. Yaña llecosa ñeñtey arromñateneshay ñeñtey e'ñe po'ñoç po'mrenñey pen Abraham; ñeñto'marña ñapa' mueneñ o'ch yenposey. 17 Ñeñto'marña ñocoppa' e'ñe poctoña o'ch acheñetos, o'ch e'ñe attetos ñerra'm ya ñeñtey pa'mo'nasheñnesha' pen. Allochñapa' e'ñe puellcapreteñoñey ya ñeñtey e'ñe pamo'ts penpa' e'ñech cohuen a'pocaterrey Partsesho. Attoña ñapa' chocma e'ñe cohuen sherbenan Pomp por atet ñerra'mrrate' ñeñt' corneshatyets Partsocop. Ñapa' e'ñe po'ñoç Pa'mcha'tareter peñ allohuen ñeñt' cornaneshatyets Partsocop. Ñeñto'marña ñapa'

e'ñe ña tsa'tuerraya allohueney acheñeneshay yo'chñar allempo ashataretta e'ñe ña po'rras. Attoña e'ñe a'pocataerrnay yo'chñar Yomporesho. ¹⁸ Ñapa' atarr mueroçhtosa allempo huapoñe't topateñets; ñeñtpa' attoch a'ypo'ñereñ Pompom. Ñeñto'marña te'pa' e'ñe puellcapreteñoñey ya ñapa' e'ñe eñoteñ o'ch yenpa'y attoch ahuamencat ñonay yeyoçher allochñapa' amach alla a'puerrataterrye topateñets ñeñtcha' allpon yehuapoya yaña.

3

Jesús ñeñt Yompor Puechemer ña metanene' ama't Moisés atto atarr sherben ña

¹⁻² Ñehua, masheñeshacha' ñaña noçhaneshacha' sapa' ñeñtes o' sa'cohuentataretterra Partsocop ñeñtes o' çhore'terres Yompor o'ch çhapterres all pue'ntaño. Te'pa' o'ch notas, o'ch soçtape'ch e'ñe cohuen ñeñt atet perrnay Cristo Jesús ñeñt yame'ñerra. Ñapa' atto allsensarettapa' e'ñe cohuen etsotuan ñeñt atet llesense' Pompom. Ñaña ñapa' ña Yecorneshar yepen ñeñt atarr sherbets Partsocop allohuenacpay ñeñtey ame'ñenaya Yompor. Ñapa' e'ñe attecma cohuen etsotuan ora allpon ñeñt atet muenach Pompom acheñeneshacop atet pe't ñaña Moisés ñapa'çho'ña e'ñe etsotan ñeñt atet och Yompor allohuen pueyochreneshacop. Ñehua, allohuen ñeñt pueyochrenesha' pen Yomporpa' ñetpa' pa'paquell penanet Yompor. ³ Ñehua, yeñoteñ ñerra'm eñall puepahuarr pocoll

ñeñt̃ tomatenet e'ñe cohuen añcha'ña atarr cohuen yenten ñeñt̃ tomatene'. Amachña aña cohuen yenteno pocoll tarro'mar pocollpa' ama ñofaye' cohuenteno; eñallca'yeña pamo'mte' ñeñt̃ a'cohuentatene'. Attecmach yeñch ñaña Jesús atarr cohuen tarro'mar ñapa' atto ame'ñatana shonte' ñeñt̃cha' pueyochrenesha' p̃a' Pomp̃or attoña tomatosan ñaña pocoll ñeñt̃ atarr cohuen ñeñt̃cha' pa'paquell pen Pomp̃or. Moiséspa' amachña ñañeña atarr cohuen yenteno tarro'mar ñapa' ama ñaye' tomataye ñeñt̃cha' pa'paquell perr Yomp̃or. ⁴ Ñehua, yeñoteñ allohuen pocollpa' ama ñofaye' yechqueno; chocmaca'yeña eñall ñeñt̃ yechcatene'. Ñeñt̃ yechcate' esocmañen ñeñt̃ eñalleteysa ñeñt̃pa' Yomp̃orña yechcatuahue'. ⁵ Añña Moiséspa' e'ñe cohuen etsotan ñeñt̃ atet̃ yehya Yomp̃or; ñeñt̃pa' o'ch es eñotatyesan acheñenesha' tarraña ñeñt̃pa' toma'nteñtsa. Tsapañoneña Yomp̃orpa' o'ch eñotaterranet ñeñt̃ e'ñe eñotochen. Ama't e'ñe cohuen etsotenaneñ Moisés allohuenacop ñeñt̃ pa'paquell pen Yomp̃or allempo, tarraña ñeñt̃ atto sherbenan Yomp̃or pa'pacillopa' ñapa' atta pueñañra peñ Yomp̃or. Amaña Puechemereye'ña peñe. ⁶ Ñapa' añca'yeña Puechemer pen Cristo ñeñt̃cha' sherberrets tsapañoneñ allohuenacop ñeñt̃cha' e'ñe pa'paquell perr Pomp̃or. Ñapa' e'ñe cohuen etsoterran ñeñt̃ e'ñe Pomp̃orecop. Allohueneypa' e'ñe pa'paquell p̃ohueney Yomp̃or allcha' yechena ña ñerra'm allo'nach huomenc yeyemuetneña attochña e'ñe yocsheñeshocma yecua'huanom ñeñt̃ o'patatenya.

*Yomporpa' e'ñech cohuen amesaterran
pueyochreshachno ñeñtcha' e'ñe cohuen
ame'ñerraya attoch e'ñe cohuen cosherret*

7 Ñeñto'marña Parets Puecamquëño'pa' atet oten all aquellcaret Yompor po'ñoño ñeñtpa' atet oten:

Ñerra'm se'mueñ Yompor atto chore'tenes te',

8 sañapa' chochña se'mñoch, amachña cha se'charrtatatsto seyocher. Amach cha satpare'tatsche atet pe't israelnesha' ahuať allempo chopeñe'chyesete't amayo. Allñapa' epaye' atsrre'mochtana'tyesnete't.

9 All amayo satañneshaññapa' atarr topatnete't atto'ch eñotnet po'ñocho'te' atsa'tatañen. Ñetpa' atet pa'yesnete't ama't chocma entyesonete't ñeñt norrtatyesanete't. Pa'tatsoch charra' charohua entyesonete't ñeñt chocma negatyesanete't.

10 Ñeñto'marña napa' atsrre'mochen nentyesant, napa' atet not: “Ñeñt atet cotape'chenet pueyocho ñeñt ama cohuenayaye ñetpa' atarr panteñet nocop. Ama añeye' mueneneto o'ch cotape'chet ñeñt cohuen nenten na.”

11 Atarr atsrre'mochen nentanete't. Ñeñto'marña atet not ñocpuet: “Ñetña po'ñoch ama't ahuaťapa' amach nechapaterraneto allcha' pocsheñesho'pa' o'te' amesapreterrnetañ.” Ñeñto'marña ñocpuetpa' atet nena' neñoñ e'ñe na neso'chño.

12 Ñeñto'marña masheñeshacha' ñaña nochaneshacha' te'pa' o'ch notas saña, e'ñech

señota seyoçhro atet soctape'chyen e'ñe puesheña'ttsos, ñato'pa' amate' cohuenaye' soctape'cheno, ñato'pa' amate' po'ñoçhaye' same'ñeñoña Yompor. Ñerra'm po'ñoçh atet sepenapa' ñeñtpa' ñeñtach sequeçhpatterre' Yompor ama't ñeñt Yomporer ñeñt ama arromñafeshayaye. ¹³ Sapa' e'ñepa'chña cohuen soctape'chatanna'tnoma pate'tets yet tayepa'tñapa' orameñ yet allempoteñ o' çhore'terrey Yompor. Attochña so'chñarpa' amach errotenot alla shequërrserro. Attoch amach cha se'charrteno seyoçhro allochñapa' amach alla satpare'tere Yompor, ama't e'ñe puesheñarrotesa. ¹⁴ Allo'nepa'chña e'ñe huomenc yeþa'nom yeyoçher. E'ñepa'chña yeyoçhrocmañen yeyemteña Cristo atet yeþa' allempo e'ñe errtey ame'ñenaya. Ñerra'm atetcha' yeyemuetnomña allempopa' yagapapretercha' Cristo ñeñt o'patateña Pompor.

¹⁵ Ñeñto'marña o'ch alla neyerpaterrser ñeñt atet oten Yompor po'ñoñ ñeñt aquellcaret ahuatoteñ, ñeñtpa' atet oteney:

Ñerra'm se'mueñ Yompor atto çhore'tenes te' sañapa' çhochña se'mñoçh, amachña cha se'charrtatatsto seyoçher. Amach cha satpare'tatsche ñeñt atet pe't israelnesha' ahuat allempo chopeñe'chyese't amayo.

¹⁶ Ñaña te'pa' o'ch neyerpaterrser ñeñt atpare'tyesaye't Yompor allempo pueçhore'teño'tpa' eñorana'tanete't, ñetpa' ñeñtareta ñeñtet cha'nmaçha'taterr Moisés Egiptot. ¹⁷ Ñaña o'ch neyerpaterrser, ñeñt

atarr atsrre'moçhen entyese't Yompor ahua't ama't pa'tatsoch çharra' charohua, ñetpa' ñeñfareta ñeñfet atarr ochña'tare'tatsete't. Ñeñto'marña ñet allempopa' e'ñe alla colla'huet amayo. ¹⁸ Ñaña o'ch neyerpaterrser, ñeñ otarettatsa allempo ñetpa' ama't ahua'tapa' amach amnataretterreto attoch pocsheñesho'tetpa' o'te' amesapreteretañ Yompor, ñeñtpa' ñeñtara ñeñfet atarr atparña'tatsete't. Ñeñ atet otarettete't allempo, Yomporña nahuet po'ñoñ e'ñe ña pa'so'chño, tarro'mar ñapa' ama puenesho po'ñoñ. ¹⁹ Attoña yeñotenanet ñetpa' ama't puesheñarro'tetapa' amach eshcaye' çhapueto allcha' yeçha'huerretañ e'ñe cohuen pueñmañesha' tarro'mar ñetpa' ama eseshaye' cohuen ame'ñayo Yompor.

4

¹ Ñehua, Yomporpa' po'ñoçh otene yechapcha' allcha' yamesapretera allcha' e'ñe cohuen yocsha'huera Yompor ñerra'm po'ñoçhcha' yame'ñera yaña. Tayepa'tña' orameñ atet otene yaña e'ñe yemcha'naño'tpa' yame'ñyepa'ch te't puesheña'ttso'tespa' amate' seçherro saña all. ² Tarro'mar ñeñ atpare'taye't all amayopa' aserrpare'tatarettetaña cohuen ñoñets Yomporesho't tarraña ama huenetoña pa'tparñet tarro'mar ama't e'metaña' ama eseshaye' ame'ña'pahuoye' entaye. Yapa'çho'ña o' serrpare'taterryet yaña cohuen ñoñets Yomporesho't. ³ Ñeñteycha' e'ñe po'ñoçh ame'ñerraya Yompor ñeñteycha'ña çherrets allcha'

yamesapretera allcha' e'ñe cohuen yocsha'huera Yompor. Ñeñña ama ame'ñetsopa' ñetpa' amach esesha' çhertso allcha' coshapreteret Yompor. Ñeñtpa' e'ñe attecma ñeñt atet otareta ahuať ñeñt ama ame'ñatso. E'ñe atet oteneý Yompor po'ñoñ all aquellcareť, ñeñtpa' atet oten Yompor:

Atarr atsrre'moçhen nentaneteť ñeñto'marña atet nena' neñoñ ñocpuet: "Ñet po'ñoçh ama't ahuaťapa' amach neçhapaterraneto allcha' amesapreterrnet allcha' e'ñe cohuen cosha'huerrnetañ."

Attoña ñetpa' amach eseshaye' çhertso allcha' e'ñe cohuen coshapreteret Yompor. Ñehua, ahuať Yomporpa' ña orrtate' ameseñets e'ñe allemputeñ yeçcatuahuan pats ñaña enet. Ñeñña ameseñetspa' atarr coshateney yeyoçhrocmañen.
⁴ Tarro'mar all po'ñoño yeñoteñ atet aquellcareť, ñeñtpa' atet oten:

O' yeçcatuan Yompor allohuen ñeñt allpon yeçcatyesua, po'cançherrmatñoñapa' o' ames Yompor.

⁵ Tarraña po'pocheño all oterrerr Yompor po'ñoñ ñeñt aquellcareť, ñeñtpa' atet oten:

Ñeñt ama name'ñenayopa' amach eseshaye' çhertso allcha' amesapreterrnet attoch e'ñe cohuen coshapreterrnet.

⁶ Ñeñto'mar yeñoteñ ñeñt e'mayeñ ahuať cohuen ñoñets ñetpa' amach eseshaye' çhertso allcha' amesaterranet Yompor attoch e'ñe cohuen pueyoçhrohuen cosherret tarro'mar ñetpa' ama eseshaye' ame'ña'pahuoye' entaye Yompor. Tarraña ama't atteñpa' yeñoteñ Yomporpa' ama

puenesho po'ñoñ. Ñeñto'marña te'pa' yeñoteñ Yomporpa' atterach e'ñe cohuen amesaterran ama't erra'tsena ñeñtcha' po'ñoçh ame'ña'po' enterre', attochña ñetpa' çherretcha' allcha' e'ñe cohuen cosherret. ⁷ Ñehua, ñeñto'marña Yomporpa' onañcherran po'poñ po'yeter, ñeñtpa' o' çherr te' esheccha' ama't patantarra acheñpa' o'ch ame'ñeñet. Ñeñto'marña yeñoteñ Yomporpa' ora attera cohueney tarro'mar ama't metuen aton char allempoteñ atpare'chete't all amayopa' o' çhap allempo atto eñosatan David. Ñeñtpa' ñeñtara ñeñt o' notuanmas:

Ñerra'm esempoch se'mueñ Yompor atto çhore'tenes sañapa' çhochña se'mñoçh tayepa'tña orameñ yet allempo o' çhore'terres Yompor, amachña cha se'charrtatatsto seyoçher.

⁸ Ñehua, yeñoteñ Josué ahuatpa' e'ñe çhapatan israelnesha' puechemereshachno all patso ñeñt all sechete't ahuatoteñ allcha' yeçhoret. Tarraña ama't çhapatanetañ allpa' ama eseshaye' pocsheñesho't pueyoçhrohuen amesostsoña all. Ñerra'm e'ñech cohuen amesatuerranetañ Josuépa' amach onañcherranñerroña Yompor po'poñ po'yeter attoch coshaterrey e'ñe cohuen yeyoçhrohuen. ⁹ Ñeñto'marña yeñoteñ te'pa' eñallmeñ ñeñt o'patatenya Yompor ñeñtey pueyochresha' pen allcha' e'ñe yocsheñeshocmañen yamesuerr. Ñeñtpa' e'ñe atet ñerra'mrrate' allempo ames Yompor ahuat po'cançherrmatño. ¹⁰ Tarro'mar allohuen erra'tsencha' çherrets allcha'

amesaterranet Yomporpa' ñetñapa' amach
 alla es llecaterrahuete'te; e'ñe pameseño'tet
 cohuenpa' e'ñech eñmaterret pueyo'chrohuenet
 atet ñerra'mrrate' allempo e'nuan e'ñe poctacma
 Yompor po'taruas, e'ñe pocsheñeshocma ames.
 11 Yapa'cho'ña añepa'chña ye'nen attoch
 ye'cherr yamã allcha' amesaterrey Yompor
 attochña e'ñe yocsherra yeyo'chro. Te'ñapa'
 ama't puesheñarro'teyapa' amuepa'ch alla
 yatpare'terre'te te't ama ye'cherro yamã all.

12 Yompor erro't otene'y, po'ñoñpa' atarr
 ahuamencat ñeñ'tpa' ama ahuañaña'te. Ñeñ't
 po'ñoñpa' e'ñe atet etsotenan ñeñ't atet muenen
 ña. Po'ñoñpa' allo 'chocma ñerra'mrrate' cochell
 ñeñ't atarr etsotañtatare'ñ emoto'mar. O'ch
 es yepata' allopa' e'ñech be'tosua ora, e'ñech
 pecha'tam'pesuoñ ama't posapohuen. Atetca'ye
 penaña Yompor po'ñoñ e'ñech 'chaponaya e'ñe
 yeyo'chro ama't e'ñe yecamquëñohuen, ñeñ'tcha'ña
 e'ñe ye'ñotaterre' ñeñ't yeyo'chro'tsen ama't
 ñeñ't allpon yoctape'chyen ora esocmañen.

13 Ama't puesheñarro'teya amach erro'tenot
 ye'potam'pesyoña Yompor ñeñ't yeye'chcate'.
 Amate' erro'tenot ya'nasotam'pesyoña, ñapa'
 e'ñeca'ye entuennayña yeyo'cher ñeñ't ora allpon
 es yoctape'chyen. Ñapa' ñach ya'metatatuerre'
 allohuen ñeñ't allpon yoctape'chyen.

*Jesúspa' ña corneshaterrets, e'ñe metana'tuerran
 allohuen cornaneshach'no atto atarr sherben ña*

14 Ñehua, ye'ñoteñ eñall ñeñ't Yecorneshar
 yepen ñeñ't atarr Partseshatets, ñeñ'tpa' ñeñ'tara
 Jesús ñeñ't Yompor Puechemer. Ñaña'pa' o'

alla çherr allohuanen pue'ntaño e'ñe all Pomporesho, allña e'ñe cohuen a'pocstatennay yocop. Ñeñto'marña yapa'cho'ña allo'nepa'ch yeyemuetneña. Amuepa'chña yequeçhpatstere. ¹⁵ Tarro'mar Jesús ñeñt Yecorneshar yepen ñapa' e'ñe eñoteñ attoch e'ñe cohuen llecapretenya allempo ama e'ñeye' huomencaye'yenteno yeyoçhro. Tarro'mar ñapa'cho'ña attecma huapoñe't allohuen pa'namen topateñets, e'ñe atet yepena ya te' çhocma huennaya pa'namen topateñets. Tarraña ñapa' ama't pa'namen huapoye't topateñets, ñapa' ama't parrocha ama ãano ñeñt ama pocteye' enteno Pompor. ¹⁶ Ñeñto'marepa'chña e'ñe yeyemteño't Yompor Puechemer, amach yemcha'naño'teye' yeçhore'teñe Yompor ama't ñeñt atarr partso'tets po'conaño. E'ñe puemuereno'tey e'ñech cohuen e'mñoteney, çhocmach yenpueney. Ñaña ñerra'm esempo huennaya ñeñtcha' yelcatene' ñachña e'ñe ahuamencat yepene'.

5

¹ Ñehua, yeñoteñ allohuen ama't erra'tsena ñeñt pa'mcha'tareter pen ñeñt corneshatyets judioneshacop, ñeñtpa' acheña, arromñaña. Ñapa' añecop acrare'tta ñach anarettatsa attoch eñen acheñeneshacop Yomporesho. Allempo es apueñet Yomporpa' ñach anene' o'pono Yompor pa'paclo. Allempo muetsenet payara ñeñt allo sherbeñet Yomporpa' ñach nene' eyarra po'rras allo tsa'tenana pueyochresha'çhno po'chñar. ²⁻³ Ñapa'cho'ña ama huomencaye'

enteno pueyočhro țarro'mar ñapa' arromñaña ñeñto'marña ama e'ñe pueyochreshacpayaya nenanoña eyarra po'rras; ñeñtpa' ñocpa'naña neñ allo tsa'tenana ñaña po'chñar Yomporesho. Atto ñapa'cho'ña ama huomencaye' enteno pueyočhro ñeñto'marña ñapa' e'ñe eñoteñ o'ch llecapretana pueyochresha' allempo es pantenet ñet ñaña allempo yečcatenet ñeñt sosey enten Yompor țarro'mar amaña e'ñe ñeñta neneto pueyočhreto; čhocmaña pueseñet Yompor.

⁴ Ñaña yeñoteñ ama't e'ñe puesheñarrapa' ama eseshaye' netso e'ñe ñañeña attoch corneshat Partsocop. Ñeñtpa' Yomporña chore'tene' ama't erra'tsena puesheñarr ñeñtcha'ña corneshatats. Ateť pa ñaña Aarón, ñapa' Yomporña ne' atto corneshate't Partsocop. ⁵ Cristopa'cho'ña attecma pa ñaña ama ñaye' otatso, "napa' nach corneshatats." Pomporña ne' ñeñtcha' corneshatats attoch yeco-huentateññañ. Yeñoteñ Pomporpa' atet cohuentateñ țarro'mar Yompor po'ñoñ ñeñt aquellcareť ahuat ñeñtpa' atet oten:

Papa' Nechemerep, te'ñapa' o'ch neñotach acheñenesha' po'ñočh pa'pa' Nechemer nepeneť țarro'mar te'pa' o'ch nenať pa'ch añcha'tareťterrtsa.

⁶ Po'poñ aquellcareťopa' all otererr:

Papa' attoch pecorneshaterrpa' ñeñtpa' amach huañerro ama't e'ñe errponaña. E'ñe atet o' pa'llsensareťterra atet ñerra'm Melquisedec ñeñt corneshatateť ahuat.

⁷ Allempo allo'tsenmeñ Cristo arr patsropa' ma'yochamřsa ñañeña. Ma'yochamřsa e'ñe

huomenc puellquëñesha'. Pueya'chpeñesha' enaman Pompor ñeññ atarr ahuamencatesha' attoch a'queshpach puerromueñoñ. E'ñe pomñcha'na'teñoñan Pomporpa' atet och: "Amach añeye' atet pepatstono ñeññ nemnen na; añcha'ña atet pepon ñeññ pemnen pa." Ñeñto'marña Pomporpa' e'ñe e'mñnoch. ⁸ Ñehua, Cristo ama't e'ñe Yompor Puechemerpa' ñapa'cho'ña atarr muerochta, attoña e'ñe yeçhan attoch e'ñe cohuen e'mñnoten an Pompor. ⁹ Atto yeçhan pue'mñnoteña' ñeñto'marña e'ñe etsotuan ora attoch a'queshpataña, allochñapa' attoch a'queshpateran e'ñe poctacma allohuen erra'tsencha' e'mñnoterre' ña. ¹⁰ Ñeñto'marña Pomporpa' ne' ñach corneshaterrets Partsocop e'ñe atet corneshate't ahuat Melquisedec.

Ñeññ ama huomencaye' penaye pueyoçher Yomporecop cha ottena ñerra'm ematoll

¹¹ Ñeñtpa' orameñ shontemeñ nemneñeñ o'ch notaseñ. Tarraña ama'tcha' notaseña' atarr torrapo' o'ch neçhapatonas seyoçhro tarro'mar te'pa' o'huañ tama semne' ama't erra'tsenapa' o'ch se'mñnoteñ. ¹² Sapa' ahuatoteñ same'ñenañ ñeñto'marña te'pa' socoppa' añ poctetsañ o'ch seyçhatyeseñ po'potantañeçhno ñeññ allpon shonte' seño tyeneñ. Tarraña saña'papa' amaña atteye'ña sepeno tarro'mar sapa' teme'ttsen sepalltena o'ch alla yeçhaterrseterr Yompor po'ñoñ ñeññ yeçhatuaset e'ñe ñenmat' ama't ñeñtpa' ama torrapahuoyaye yocop o'ch yeñoçh. Sapa' ama huomencaye' sepeno seyoçher tarro'mar

sapa' čha sottena ñerra'mrrate' ematoll ñeñt' añach orren pachor pomosos ñeñt' ama etsotenana' o'ch rran rreñets ñeñt' yerren ya. 13-14 Ñaña yeñoteñ allohuen ñeñt' añach pocrramñ pen pomosos, ñeñt'pa' ematolla ama eñotenana' o'ch e'nan rreñets ñeñt' chocma yerren. Ñaña ñeñt' ottetsa ñerra'mrrate' ematollpa' ama eñotenanoña Yompor po'ñoñ attoch pocte' eñch Yompor. Tarraña ñeñt' po'ñočh atet enten Yompor ñerra'mrrate' po'nanesha' ñetpa' e'ñech eñotenet ñeñt' pocte' enten Pomporet ñaña ñeñt' ama pocteye' enteno; tarro'mar ñetpa' ahuatoteñ ame'ñeret Pomporet. Ñeñto'marña ñetpa' allo'na senet etsotnomuet Yompor po'ñoñ ama't ñeñt' atarr echarr ñeñt'ña e'ñe pocrramñ penet.

6

1-3 Allo'nepa'ch yesen e'ñe yečha'nmue' Yompor pocta'ña ama't ñeñt' atarr echarr. Allochñapa' yepeno' atet muenen ñapa' e'ñech po'n enteneyña Yompor. Ñehua, sapa' o' e'ñe seyčherr ñeñt' ñenmañ yečhataset Cristocop, attoch sequečpa'huerrña ñeñt' atet seyečcatyeseñ ñeñt' ama a'queshpatañeyaye. Añca'yeña o' ello soctape'cherr cohuen Yomporecop čoca'yeña o' same'ñera. O' seño'terr ñaña ñeñt' atet yapatare'tena Yomporecop, ñaña atto chocma yenen yot ñesheto ñeñt' ame'ñatsa. Ñaña o' sa'yčhatare'tterra attoch yetanterra ñaña attoch esempohuañenpa' ya'crare'tterrach allohueney errotench'a' entyesuerrey Yompor, ñato' cohente' ye'pa'yen, ñato' amate' cohuenaye' yepeno. Ñeñt'

o' yečhatuanmaset ahuañoñeñ Cristocoppa' amachña ñeññaña alla seserrpare'tame'terre'te. Añcha'ña allo'nepa'chña yesen eñotnomue' po'poñečno Yompor poctañña ñerra'm Yomporcha'yemnite'.

⁴⁻⁶Tarro'mar yeñoteñ ñerra'm esesha' o' čhapoña pueyočhro ñeññ cohuen enten Yompor ñaña ñerra'm o' agapan Yompor ñeññ apueney attochña yapa' corretsayach tayoteñ errponohuañen pue'ntaño, ñaña ñerra'm o' agapan Yompor Puecamquēñ ñaña ñerra'm čho yomenana Yompor po'ñoñ ñaña ñerra'm eñotuanman Yompor po'huamenc ñeññ ama ahuañañañeñyaye, tarraña ñerra'm o'ch alla puerrerret, ñetpa' amach errotentōt alla yoctape'chaterranete'te attoch cotape'cherret etserra cohuen Yomporcop. Tarro'mar ñeññ acheñerpa' añ toma'ntena ñeññ atarr muenene' o'ch alla corso'tañperranerr po'pocheño Yompor Puechemer; attoña o' alla achmāre'tererr allo'tsa'yen shonte' acheñenesha'.

⁷Ñeññ atet petsapa' o'ch netma'ntacha ñeññ atet pena pats. Ñehua, allempo e'ñe cohuen huapotañpsatenan Yompor pats ñerra'm o'ch chepares pa'namen narmetsočno ñeññcha' coshatene' pamo'mte' ñeññ nare'tene', Yomporña čhocma a'torene' ñeññ pats esheccha' pa'namen yečhquētsa all. ⁸Tarraña ñerra'm aña cheparsats pa'namen ajačno ñeññ ama cohuenayaye, ñeññña patspa' amach es sherbeno. Yomporeshotpa' arrnomare'terrach attoch a'poyare'terra.

Atto e'ñe yeyemteñoñ Yompor čhocmach yecuen ñeññ o'patatyenya

⁹ Tarraña ama't atet notensoñ masheñneshacha' sa ñeñtes atarr nemorrentena, napa' necuenes ñaña neñotenes sapa' o'ch alla sorrattyerr e'ñe cohuenare' ñeñt atet orrtatyen allohuen ñeñtcha' qeshperrtsa. ¹⁰ Tarro'mar Yomporpa' e'ñe pocte' es pennay. Ñapa' chocma po'ñoch entenes ñeñt atet setorra'yena ñocop ñaña atto semorrenteññaña allohuen ñeñt pueyochresha' pen Parets. Ñeñto'marña e'ñe same'ñeñoñ ñapa' e'ñe cohuen seyempa'yeyñ allohuen masheñneshachno ñeñt pueyochresha' pen ña, ama't teme'ttsen attecma sepena. ¹¹ Añña atarr nemnen ama't allohuenespa'allo'nepa'chña sesen orrtatyenesnomue' ñeñt cohuen enten Yompor, e'ñechña socsheñeshocmañen sorrattyesianom allohuen ñeñt cohuen enten Yompor e'ñe atet socsheñoñ chocma seyempa'yeyñ ñeñt pueyochresha' pen Parets. Attoña e'ñe seyemteñoñ Yompor secuen ñeñt o'patatenya. ¹² Attochña amach cha secllatsto Yomporecop, añcha'ña sepena samña ñeñt atet pa'yena po'potantañechno ñeñt pame'ñeñoñtet Yomporpa' ama't erro'tuaneno'tsa'yenet ñetpa' chocma ahuanta'huaneñet. Attochña e'ñe o'patueññañet Yompor ñeñt oteneý Yompor ñeñtcha' aphuerrey.

¹³ Tarro'mar yapa' yeñoteñ chocmach aphuerrey ñeñt atet oteneý. Ñehua, yeñoteñ Yompor ahuatpa' atet otane't Abraham ñeñtcha' atet perrñañ tsapatonet po'mrenñecop. E'ñe ñañeña pa'so'chño atet otan Abraham tarro'mar ama eñalle po'poñ ñeñt atarr ahuamencatesha' atet ñerra'm ña allcha'

a'pochtatan po'ñoñ. ¹⁴Ñeñto'mar e'ñe ña pa'so'chño atet otan Abraham: "Na po'ño'chpa' atarrcha' nebensare'tam̄psaḡ attochña na'mraterrnaḡ ñeñtcha' pem̄reneñ peperr." ¹⁵Ñeñto'marña Abrahampa' e'ñe pueyemteñoḡ Yomp̄or po'ñoñ atet oteñ ñapa' ama quechpueñe, chocma cohuenan ñeñt atet oteñ Yomp̄or. Ñeñto'marña Abrahampa' po'ño'ch agapater Yomp̄or ñeñt atet ochet̄ ahuatoteñ. ¹⁶Ñehua, yapa' yeñoteñ acheñ arr patsro ñerra'm es muenenet o'ch es otenet e'ñe po'ño'ch, ñetpa' o'ch otenet e'ñe añ pa'so'chño ñeñt atarr ahua mencatesha'. Ñerra'm atet penetpa' attoña eñoteñet ñeñt ñoñetspa' o' anareḡta, o'huañcha' allo'na otnare'tanna'tnenet po'ñoño'maret. ¹⁷Yomp̄orpa'cho'ña e'ñe attecma nan po'ñoñ e'ñe ña pa'so'chño tarro'mar ñapa' mueneñ o'ch eñotateney amachña a'po'poñetaḡperryeña po'ñoñ, allohueney ñeñtey o'patatena ñeñt atet oteney o'ch apuerrey. ¹⁸Ñeñto'mar yeñoteñ Yomp̄orpa' e'ñe epoch eñotateney e'ñe po'ño'ch atetcha' perrnay, ñaña Yomp̄or po'ñoñpa' ama choye' shequēnye. Ñeñto'marña e'ñe yeyemteñoḡ ñapa' yeñoteñ po'ño'chpa' a'queshḡpatuerreycha' ñeñt atet oteney. Ñeñto'marña yecueñ ama't allohueney ñeñtey e'nene' ña ñachña ya'queshḡpatuerre'. ¹⁹Ñeñto'marña yeñoteñ ñeñt yecuen ya o'ch a'queshḡpatuerrey Yomp̄or ñeñt̄pa' e'ñe po'ño'ch, ñeñt ama ahuañañayaye. Ñeñto'marña yeñoteñ e'ñe yeyemteñoḡ ña yecamquēññapa' e'ñe cohueno'tsen amach errotenoḡ chenquēro.

Yeyemteñoť Yompor ñeñťpa' añ toma'ntena ñeñť orrene' barco oño ñeñť otenet ancla. Allochña barcopa' amach errotenoť chenco. Ñeñť atto yeyemteña Yompor ñeñťña anclatetsña yecamquëñecop ñaña ñeñťpa' e'ñe po'ñočh allo e'ñe huomenc orrena yecamquëñ țarro'mar ñeñťpa' Yomporeshoť anaret e'ñe allohuanen ñeñť allo'tsen Parets pa'paclo pue'ntaño, e'ñe allohuanen allo'tsen besom allo yottampeññañet Parets po'poner. Allca'yeña anarettenaña ñeñť toma'ntenaya ancla atto ya yeyemteña Yompor. ²⁰ Tarro'mar e'ñe all Partseshopa' allña o' cherrña Jesús ñeñť o' otamperrya allcha' a'pocatosnay e'ñe cohuen yocop Pomporesho. Allñapa' o' corneshatuerr Partsesho. Atto o' corneshatuerr ñeñťpa' amach huañerro ama't errponaña. E'ñe atet o' allsensaretterra o'ch corneshatuerr ñerra'mrrate' atet corneshate't ahuat Melquisedec.

7

Jesúspa' atarr cohuen corneshatos Partsocop atet corneshate't ñaña Melquisedec Partsocop ahuat

¹ Ñehua, te'pa' o'ch alla neyerpaterrsa ñeñť atet pe't ñeñť corneshatatse't ahuat ñeñťpa' añ pa'so'cheñ Melquisedec. Ñapa' ñeñť corneshatatse't Partsocop ñeñť atarr partsotets. Ñaña ñapa' ñeñť amcha'tarettatse't all anetso ñeñť pa'so'cheñ Salem. Allempopa' correna ñaña yatañ Abraham. Parrochña Abrahampa' ahuo' allcha' quellarenana' po'potantañečno

ñeñt̃ añcha'tareṭetyetsa allo'mar. E'ñe a'mchechuahuenaneta'pa' huerra. Allempo err, toño'pa' all poctapueñ cornesha' Melquisedec. Allña pocteñpa' allenta bensare'tam̃psapuenan Abraham. ² Ora ñeñt̃ allpon yoram̃psan ñeñt̃ o' quellara'huena'pa' allempoña Abrahampa' aphuenan cornesha' Melquisedec allpon ñeñt̃ Partsocop. Allpon aphueñpa' ñeñt̃pa' ñeñt̃ allpon otenet la décima parte. Ñeñt̃pa' atet̃ñerra'm es eñall ñeñt̃ yechen çharrapa'ttsocma, pate'tetsñapa' o'ch yeneñ e'ñe Partsocop. Ñehua, ñeñt̃ so'chñetser Melquisedecpa' añ otenet "ñeñt̃ pompor pen allohuen añcha'tareṭeçhno ñeñt̃ e'ñe pocte' enten Parets." Alloṭpa' ñaña ñapa' arr añcha'tareṭtena anetso añ pa'so'cheñ Salem. Ñeñt̃ anetser pa'so'cheñ añ otenet "muechet̃teñtsompañño" tarro'mar all añcha'tareṭtena ñapa' ña orrtatene' e'ñe cohuen morrentanna'teñets attoña yeçhenet e'ñe cohuen muechet̃. ³ Ñeñt̃ Melquisedecpa' ama eñotpahuoyayeña ñeñt̃ pompor pe't̃ ñaña ñeñt̃ pachor pe't̃ tarro'mar ama aquellcareṭeyaye ñeñt̃ pa'so'cheñ. Ñaña ñeñt̃ pa'tañneshañ pe't̃ ñeñt̃pa'çho'ña ama eñotpahuoyaye. Ama't̃ ñaña allempoteñ eñalleta Melquisedec ama't̃ ñaña allempo rroma ñeñt̃pa'çho'ña ama eñotpahuoyaye. Ñapa' tarro'mar atet̃ pe't̃ añ toma'ntena ñeñt̃ Puechemer pen Parets. Ñeñto'marña atto corneshaten ñeñt̃pa' amach huañerro ama't̃ errponaña.

⁴ Señohepa'ch cornesha' Melquisedec ñapa' atarr sherben. Ama't̃ yatañ Abrahampa' çhocma

es apane't Melquisedec atet ñerra'mrrate' ñeñt es yenen ñeñt Partsocop. Añ aphueñ ñeñt allpon yoram̄psan ñeñt o' quellara'huena'. Allpon aphueñ ñeñt atet ñerra'm cho es yenen Partsocop ñeñtpa' atet ñerra'mrrate' ñeñt allpon es yechyen e'ñe çharrapa'ttsocma, pate'tetsñapa' o'ch yeneñ e'ñe Partsocop. ⁵ Ñehua, yeñoteñ levína'tarnesha'pa' ñeñtēna'tarña anarettatset judioneshacop ñeñtcha' corneshatets Partsocop. Ñocpuetña nanña Moisés po'ñoñ, ñeñtña ñoñetspa' atet oten ñocpuet: E'ñe pocte' secobreñ acheñenesha'. Apa'yenetepa'ña allponapa'tets ñeñt Partsocop, atet ñerra'mrrate' ñeñt allpon yechyen e'ñe çharrapa'ttsocma, pate'tetsñapa' o'ch yeneñ e'ñe Partsocop (ñeñtara otenet diezmo). Ñeñto'marña chocma cobreñetña pamo'tsesha' ama't e'ñe ñeñtēna'tarecmuet, tarro'mar Abrahampa' ñeñtara pa'to' p̄ohueñet allohuenet. ⁶ Tarraña Melquisedec ama't ñapa' ama levína'tarneshayaye ñañaapa' ello metana'tuenanet ñet tarro'mar ñapa' ama't yatañ Abrahampa' agapoñe't allpon ñeñtcha' aḗ Partsocop. Elloña bensare'tam̄penan Abraham ama't Abrahampa' o' otue Yompor ñach bensare'tam̄pse'. (Abrahampa' e'ñe pocte' enteñ tarro'mar atarr ahuamencatesha' entenan Melquisedec.) ⁷ Ñehua, yeñoteñ po'ñoçh ñeñt atarr nanac am̄cha'tarettetsa ñapa' ñachña bensare'tam̄pene' po'potantañeçhno ñeñt ama tama am̄cha'tarettetso atet ñerra'm ña. Ñeñto'marña yeñoteñ Melquisedecpa' atarr sherben tarro'mar ama't am̄cha'taret

Abrahampa' ñapa' ello bensare'tam̃peñ.
 8 Ñeñt̃ yenten arr patsro ñeñt̃ corneshatets
 Partsocop, ñetpa' arromñãtõta atet̃ penet.
 Tarraña ama't arromñãtõta atet̃ penet̃ chocma
 aguẽññãnet̃ acheñenesha' ñeñt̃ apa'yenet̃
 Partsocop. Melquisedecpa'cho' ñaña agapaye't̃
 ñeñt̃ apa'yese't̃ Partsocop. Tarraña Melquisedec
 ñeñt̃ atet̃ anaret̃ Yompor po'ñoño ñocop
 ñeñt̃pa' atet̃ oten ñerra'mrrate' ñapa' ama
 arromñãteshayaye. 9-10 Ñehua, ñato' o'ch yot
 Leví ama't allohuen pue'ñareshohuen, ñeta'naña
 agapam̃psanet̃ Melquisedec ñeñt̃ allpon apueñet̃
 Partsocop e'ñe allempocma agapan ñeñt̃ ãp̃
 Abraham Partsocop. Ama't ama eñalletena'
 Leví allempopa' te'pa' o'ch yot ñapa' e'ñe
 pa'to' Abraham po'chtso'tsen allempo, allempo
 pocten Melquisedec. Ñeñto'mar te'pa' o'ch yot
 levína'tarnesha' ñeñt̃ po'taruas pene' o'ch cobran
 acheñenesha' attoch allpon apa'yenet̃ Partsocop,
 ñeta'netepa'tña cobra'ña allempo Melquisedec.
 Ñeñto'marña yeñoteñ Melquisedecpa' atarr
 sherben, ello metana'tuenan levína'tarnesha'
 ñeñt̃ corneshatyets Partsocop.

11 Ñehua, yeñoteñ ahua't allempo apare'tta israel-
 nesha' ñoñets ñeñt̃ atet̃ anaret̃, ñeñt̃pa' añ orrtate'
 levínesha' ñeñt̃ corneshatyestse't̃ ahua't Partsocop.
 Tarraña añ ñoñets ñeñt̃ orrtat̃ cornaneshachno
 ñeñt̃ara levínesha'pa' ñeñt̃pa' amach erroteno't̃
 a'cohuentaterranetoña Yomporecop. Ñerra'm
 po'ñoçcha' a'cohuentatenyeñ amate' eso'mar
 huapoña Cristo ñeñt̃cha' corneshatosets ello

ñeñt atet corneshate't Melquisedec, ñeñtpa' ama atteye' corneshatoso ñeñt atet corneshaten Aarón ñeñtara levína'tarnesha'. ¹² Ñehua, yeñoteñ ñerra'm esempo Yomporpa' orrtaterran po'psheñeñ ñeñtcha' corneshaterrets po'poñonet, yeñoteñ añ ñoñets ñeñt atet anaret ñeñt orrtat cornanesha' levína'tarnesha' ñeñt ñoñtsorpa'cho'ña o'ch cha po'poñetuerr. ¹³⁻¹⁴ Yeñoteñ Yepartseshar Cristo ñeñtña otenña Yompor po'ñoñ ñeñtcha'ña ello corneshatosets. Yeñoteñ ñapa' ama levína'tareyaye, ñapa' judámereñtsoro't eñalleta, ñeñt po'poñ mereñtsor ñeñtara israelena'tar. Ñetpa' ama anaretayayeto o'ch corneshatet Partsocop ñeñt atet anare'tta levína'tarneshacop. Moiséspa' ama esoye' sochaneto ñocpuet ama't puesheñarro'ta attoch corneshatet. Ñaña ñetpa' ama't puesheñarro'teta ama eseshaye' tetso altaro allotecma sherbeñet Parets.

¹⁵ Elloña yeñoteñ o' po'poñet ñeñtcha' e'ñe cohuen corneshaterrets tarro'mar allempo orrta Cristo, ñach corneshaterrets atet anare'tte't Melquisedec. Ñapa' ama atteyaye ñerra'mrrate' atet anare'tte't levína'tarnesha'. ¹⁶ Atto corneshatos Cristo ñeñtpa' ama añecpayaye attoch allo'na corneshatnen levína'tar ñeñt atet anare'ttenet ñocpuet. Ñapa' añecopña corneshaterr Partsocop tarro'mar ñapa' ña atarr ahuamencatesha' ñeñt ama arromñateshayaye ama't errponaña. ¹⁷ E'ñe Cristocop eñotateney añ ñoñets ñeñt atet anaret Yompor po'ñoño, ñeñtpa' atet oteñ Pompor:

Papa' attoch pecorneshaterrpa' ñeñtpa' amach

huañerro ama't e'ñe errponaña. E'ñe atet o' pa'llsensare'tterra atet ñerra'm Melquisedec ñeñt corneshatatse't ahuat.

18-19 Ñeñt ahuatoteñ ñoñets ñeñt atet nonaye't Moisés ñeñtcha' atet ye'pohueneñ ñeñtña te'pa' o'huañcha' ye'cua'per tarro'mar ñeñt'pa' ama eñalle po'huamenc attoch ñeñtcha' ya'cohuentaterre' Yomporecop, e'ñe orrena atarr yetorra'yese't. Tarraña te'pa' o' orrterranya po'poñ ñeñtñapa' ello atarr sherben ñeñtcha' ya'cohuentaterre' Yomporecop esheccha' yecherr Yomporecho ñeñtcha'ña atarr yeyemterraña te'.

20 Yomporpa' e'ñe ña pa'so'chño nan po'ñoñ allempo llesensan Cristo ñach corneshaterrets erponañohuen. 21 Po'potantañechno ñeñt corneshatyets ñeñtara levína'tarnesha' allempo acornesha'tare'tetyeset ñetpa' ama Yomporeye' nahueto pa'so'chño attoch corneshatyese't. Tarraña Cristo allempo allsensare'tta attoch corneshatos, ñeñt eñoraten Yompor Cristocoppa' ñeñtñapa' atet oten:

Yompor o' nan po'ñoñ e'ñe ña pa'so'chño ñeñto'mar amach erro'teno't a'po'poñetuerrano po'ñoñ; (ñeñt'pa' atet ot Cristocop): "Papa' attoch pecorneshater'pa' ñeñt'pa' amach huañerro ama't e'ñe errponaña. E'ñe atet o' pa'llsensare'tterra atet ñerra'm Melquisedec ñeñt corneshatatse't ahuat."

22 Ñeñto'marña Jesús'pa' eñotochtaterrnay po'ñoñ atto Yomporpa' a'poc'aterrnay etserra ñeñtña atarr sherbets, ello o' metana'tuerran ñeñt atet a'poc'atonaye't ahuat. 23 Ñeñt ahuatoteñ

cornaneshachno ñeñtara levína'tarnesha', ñetpa' epaye' shonta'nmuert tarro'mar chocmach rromayesete't attoña o'huañcha' allo'na corneshatyesnenet. Ellopa' o'chcho' huapa po'psheññ ñeñtara levína'tar ñeñtcha' alla corneshaterrets. Ñeñto'mar epaye'shonta'nma ñeñt corneshatyesnomtse't ahuatoteñ. ²⁴ Tarraña Cristopa' errponañohuencha' corneshaterr tarro'mar ñapa' ama arromñateshayaye. ²⁵ Ñeñto'mar Cristopa' ña eñotene' attoch chocma a'queshpātenan allohuen ñeñt e'nene' Yompor ñerra'm e'ñe pueyemteñotet ña, tarro'mar ñapa' chocma allo'tsen Pomporesho allecma a'pocatatennay ñeñt e'ñe cohuen yocop. ²⁶ Ñeñtpa' e'ñeca'ye pocte'ña yocop o'ch yechen Yecorneshar ñeñt Cristo tarro'mar ñapa' e'ñe cohuen Parets, ama eñalle po'chñar ama't mamesha ñeñtcha' a'sosyatene'. Ñapa' o' sohuanerran allohuen ñeñt cotene' sosya'tsañ o' alla cherr allohuanen Yompor pue'ntaño allña partsotapretenan Pompor. ²⁷ Ñapa' ama atteye' pōso ñerra'm po'potantañ cornaneshachno ñeñt ahuatoteñ. Ñet pate'tets yetpa' epaye' muertsete't payarachno; ñeñt eyarra po'rraspa' alloña peretnatane'tña cornaneshachno po'chñar. Ellonetpa' o'ch peretnateñet ñaña allohuen acheñenesha' po'chñar ñeñtara eyarra po'rraso. Tarraña Cristo ñapa' e'ñe parrocha shatan e'ñe ñañeña po'rras allohuenacop ochñartsocop allempo rroma yocop e'ñe ña puemnenñot; ñeñtpa' attoña tsa'tuerrnaya yo'chñar Pomporesho. ²⁸ Moisés ñeñt atet nan

ñoñets ahuatpa' ñeñtpa' acheña na'yesh ñeñtcha' corneshatyets atteta ñerra'mrrate' ya ñeñtey ama cohuenacmaye' es petso. Tarraña allempo met allpon charpa' allempoña Yomporpa' o' alla nerran po'ñoñ e'ñe ña pa'so'chño. Allempoñapa' nerran Puechemer ñeñtcha' corneshaterrets ñeñt e'ñe cohuenare' es pa'yets Partsocop; ñeñtpa' amach huañerro ama't errponaña. (Ñeñto'marña Cristopa' e'ñe etsotuan ñeñt nanac sherbets.)

8

Jesúspa' ña a'pocatañterrtsa e'ñe etserra yocop

¹ Ora allpon ñeñt o' notuanmas ñeñtpa' e'ñe po'ñoñ atet notenes: ñeñt atto atarr sherben Cornesha' Cristo te'ña ñapa' o' alla anorruerr Parets po'cohuenrot all anen po'conaño all pue'ntaño. Allñaapa' o' alla partsotuerr ñaña.

² Allñaapa' o' atarr sherba'huerr e'ñe allohuanen Parets po'prahuo all e'ñe po'ñoñ allo'tsen Yompor. Ñeñtpa' ama atteyaye ñerra'm patso'mar puerahua' ñeñt tomaten acheñ. Allpa' Yomporña tomatene'ña po'prahua' e'ñe ña pue'ntaño.

³ Yeñoteñ allohuen ñeñt corneshatets Partsocop, ñetpa' añecopña anarettenet attoch ñetcha' es apuenet Yompor ñaña ñetpa' o'ch muetsenet payaračno Yomporecop attoch peretnatenet po'chñaret.

Ñeñto'marña Cornesha' Jesús, ñocoppa'cho'ña e'ñe pocte' o'ch es apan Pompor. (Ñeñtpa' aña apuerran Pompor e'ñe ñañeña po'chets attoch rroma yocop.) ⁴ Ñehua, ñerra'm ñapa' allo'tsenaraña añe patsropa' ama't mamesha amate' pocteye' enteññeña ñeñt cornaneshatyets

añe patsro, tarro'mar ñetpa' añach e'ñe cohuen entenet o'ch es apueñet Yompor ñeñt e'ñe atet nanete't Moisés po'ñoñ. ⁵ Ñeñto'marña yeñoteñ ñeñt atet sherbenet ñet ñeñtpa' atta toma'nteñet ñeñt atto po'ñoçh Cristo e'ñe cohuen sherben Parets po'prahuo ñeñt pue'ntañotsen. Añach sherbenet ñeñt attema'ttetsa ñeñt e'ñe po'ñoçh atet muenen Yompor. Yeñoteñ ñeñtecma sherbete't tarro'mar ahua't allempo Moiséspa' ahua'ch tomataneñ ñeñtcha' po'prahua' pa' Parets arr patsro, all aspeno Yomporña gate' ñeñt toma'ntenaya e'ñe ña po'prahua' ñeñt pue'ntañotsen. Allempoñapa' atet otan Moisés: "Po'ñoçhpa' e'ñech atet peyeçhcaton ñeñtcha' neprahua' nepa' añ patsro allcha' yeçhena Necamquëñ." Arrpa' allohua atet otan Yompor Moisés. ⁶ Tarraña Cornesha' Cristo te' atto sherberr all pue'ntaño, ñeñtpa' e'ñe po'ñoçh poctacma cohuen. Ello metana'tuenan ñeñt atet sherba'yese't ahua'toteñ cornaneshachno arr patsro. Tarro'mar te' ñeñt atet o' a'poctaterrnay Pomproshopa' ñeñtña e'ñe poctacma cohuen yocop, tarro'mar añ a'poctateñetspa' pa'namen oteney ñeñtcha' atet perrnay coshateñtso.

⁷ Yeñoteñ ñerra'm e'ñe cohuen a'poctatyene't ñeñt ñenma't allempopa' amach palltenañe o'ch alla a'poctaterryeterr e'ñe ello etserra. ⁸ Yeñoteñ ñeñt ahua't a'poctateñetspa' ama e'ñeye' cohuen yenpa'ye'te tarro'mar allempo Yomporpa' ama pocteye' entane'te israelnesha'. Tarro'mar po'ñoñpa' atet oten ñeñt aquellcare't ñeñtpa' atet ot Yompor:

Chapcha' allempoch nenerrerr po'poñ
 neñoñ israelena'tarneshacop ñaña
 judána'tarneshacop, ñeñtpa' allochña
 na'pochtaterret e'ñe cohuen etserra.
 9 Ñeñtpa' amach atteyaye ñerra'm ñeñt
 atet na'pochtaterret ñenmañ pa'tañneshañ
 allempo nerraneta' Egiptot e'ñe cohuen na
 nehuamencoñ. Tarro'mar allempo ñetpa'
 ama atteye' pñoneto ñeñt atet nenanet
 ñeñtcha' a'pochtatahuetañ. Ñeñto'mar
 napa'cho'ña atta na'ypo'ñanet. Ñeñtpa'
 atet ot Yompor allempo.

10 Allempoña'pa' o' alla oterrerr Yompor ñeñtara:
 Esemphuañenpa' o'ch alla na'pochtaterret
 po'poñ ñeñt israelena'tarneshacop.
 Ñeñtpa' atetcha' neperranet allempo
 esheccha'ña nechapaterret neñoñ
 e'ñe ñet pueyoçhreto, ñeñtpa' ñato'
 o'ch netma'ntacha atto neñoñpa' o'
 aquellcatterret e'ñe ñet pueyoçhreto
 ñeñtcha' cotape'chaterrahuetña e'ñe
 cohuen. Allempoña po'ñoçhpa' e'ñech
 Po'yomporer perrnet, napa'cho'ña e'ñech
 neyochrenesha' neperranet ñamet.

11 Ñaña allempo allohuenetpa' e'ñech
 eñotuerrnanet ñeñtcha' atet
 noctape'chaterranet cohuen pueyoçhreto.
 Allohuenetpa' e'ñech attecma eñoterrnet
 pomporneshohuenet ama't ñaña
 añetolleshohuen ama't ñeñt atarr
 sherbets ama't ñaña ñeñt ama esoye'
 enteñeto. Ñeñto'marña allempo ñeñt

am̄cha'na'tpo' entetsapa' ama pallteno o'ch ye'chatan po'potantañ pamo'ts ama't ñaña pa'mo'nasheñ. Amach esesha' oterrahuate'te te'pa' añ poctetsa o'ch se'ñoter Yompor, tarro'mar allempopa' o'ch e'ñe e'ñotuerrnet.

12 Ñaña napa' e'ñe nemuereño'tanetpa' ne'pretnerranetcha' po'chñaret, amach alla neyerpuerranete'te po'chñaret. Arrpa' allohua atet ot Yompor ahuat.

13 Ñe'ñto'marña ye'ñoteñ ñe'ñt atto Yomporpa' all oten e'ñe etserra o'ch a'poctaterrey, ñe'ñtpa' tarro'mar ñapa' o' a'ypo'ñerran ñe'ñt attoch ñanom a'poctatyey. Ñaña ñe'ñt ahuatoteñ a'po'tateñets te'pa' o' a'ypo'eñare'terra, ñe'ñtpa' huañerrcha'.

9

Ñe'ñt patso'mar Yompor po'prahua'pa' añ toma'ntateññañet ñe'ñt e'ñe ña pue'ntaño'tsen po'prahua'

¹ Ñehua, ye'ñoteñ ñe'ñt atet a'poctatanetañ ahuat Yompor ñe'ñtpa' echenan ñoñets anaret ñe'ñtcha' atet sherba'yeset Parets. Ñaña arrcha' e'ñe etsotetña ñe'ñt Yomporecop e'ñe ña po'prahuo, ñe'ñt puerahua'pa' ama't acheña tomatene' arr patsro. ² Ñehua, ñe'ñt puerahuatats'e't ahuat ñe'ñtpa' shetamtsopo'. Ñe'ñt tomatenet ñehua'po'tpa' ñe'ñt otenet Partsopahuesho allo'tsen all orratenet huerare ñaña allo'tsen mesa allecma nenet pan Partsocop. ³ Allohuanen allohua ayottam̄psaret besmo po'ppahueñ shetamtsopo' ñe'ñt otenet, E'ñe Partsopahuesho

Po'ponro. ⁴ Allñapa' allo'tsen altar, enoññapa' allecma a'crratenet tsach puese' ñeññ atarr eñmosařtetsa Partsocop; ñeññña altar eno'marpa' e'ñe cohuen orotattena. Ñaña allohuanen po'ppauño allo'tsen tsapot; ñeññpa'cho'ña eno'marpa' orotaten. Allña añño'tenet mapuettall allo aquellcareř Yompor po'ñoñ ñeññ a'pocstat Yompor ahuat acheñenesacop. All añño'tenet ñaña pajo' orotaten, allña esha'tareř coñe't maná ñaña tsapoto allo'tsen Aarón po'carr ñeññ tapa'llatse't ahuat. ⁵ Tsapoto enoř all ten epsheña mellañořeñma't ñeññ ayečhcatareř ñeññ otenet querubíñ ñeññ toma'ntenaya Parets po'partsoña ñeññ chorrets all. Querubíñ pa'pa'yopa' alloña ca'matenan tsapot enoř allot e'tampenet tsapot. Allñapa' allecma peretnanete't Yompor po'chñaret. Ñehua, te'pa' o'ch noterrserre po'poñečno ñeññ pa'namen atma'ntatareř all.

⁶ Allpa' pa'namen añño'tareřetyetsa ñeññ all puerahuo. Ñaña ñeññ cornaneshatyets Partsocoppa' chocmach be'tosyenet ñeññ all puerahuo ñehuapoř, allcha'ña etsotayenet ñeññ atet anareř Partsocop. ⁷ Tarraña ñeññ allohuanen po'ppahueñ Parets po'poner ama eseshaye' be'tetsoña all. Allpa' añach be'tets puesheñarr cornesha' ñeññ pa'ñcha'tareřer pen po'potantañ cornaneshachno. Ama't ñapa' pařerr charpa' e'ñech parrocha be'ten. Ñaña chocmach anman eyarra po'rراس alloch peretnenanet Yompor po'chñaret. Ñeññpa' e'ñe ñocpa'na po'chñarecop ama't ñaña allohuen acheñenesha' po'chñarecpuet. ⁸ Ama't ñeññ

ñehuapoťsen puerahua' allecma sherba'yen cornaneshachno ñeñt atet anaret Partsocop, tarraña e'ñe allohuanen Parets po'ponro añach be'tets ñeñt nanac corneshatets e'ñe ñapueť. Ñeñto'marña te'pa' Parets Puecamquẽña yeñotatene' atto ama atorañpsareteyayye allohuenacpay attoch yečhapañpeña Yompor all partsoten. ⁹ Ñeñt allempopa' aña toma'ntena ñeñtcha' atet cohuen p̄osa tsapatoneť Cristo allempoch huapa; atet ñerra'm te'ña o' huapa Cristopa' o' etsotua. Tarro'mar allempo all Parets po'prahuo ama't es apuenetañ Yomporecop ñaña ama't es muetsayenetañ Yomporecop, ñeñtpa' arepa't a'cohuentatenanoña añ poctapña ñeñt atet sherbenayeñ Yompor. ¹⁰ Tarro'mar ora atet anarettet allempo ñeñtpa' añecpa sherben ñeñt e'ñe po'chtsocpueta ñeñt atet ñerra'm ñeñtcha' rrenet ñaña ñeñtcha' orrenet ñaña atto apa'yesete't Partsocop. Ñeñt orapa' añecpa sherbe't attoch a'pocpatenet po'chets Partsocop. Ñaña ñeñtpa' mamecpa anarettta esempohuañeña Yomporpa' orrtaterrnaycha' po'poñ ñeñtcha' ello nanac yesherberre'.

¹¹ Ñeñtpa' e'ñe tarremphua e'ñe etsoterra allempo huapa Cristo, ñeñtña orrtatose' ñeñt ello nanac sherbets te' yocop. Ñapa' atto corneshatospa' o' alla be'tosuerr allohuanen Partsopahuesho all pue'ntaño ñeñtña ello nanac sherbets Partsocop. Ñapa' e'ñe metana'tuerran ñeñt sherba'yestse't ahuať puerahuo Partsocop ñeñt tomaten acheñ arr patsro. Tarro'mar

ñeñt̃ Parets po'prahua' ñeñt̃ pue'ntañ'o'tsenpa' ama acheñeye' tomatenaye ñaña ñeñt̃pa' ama añe patsroye' atomatareyeye. ¹² Ñaña Cristo allempo be'tosuerr allohuanen Partso pahuesho ñeñt̃pa' e'ñe parrocha be'tosuerr all pue'ntañ'o. Ñaña ñapa' ama añeye' anmo eyarra po'rras — cabra amapa' huacshetoll. Ñapa' e'ñe ñañeña po'rras pomhuerr. Ñaña ñapa' e'ñe parrocha pomanña po'rras all ama't allohuen pa'namen acheñeshacop po'chñarecop. Attoña e'ñe cohuen a'pocatonay attotcha' a'queshpaterrey, ñaña ñeñt̃pa' amach ahuañañañterro ama't errponaña. ¹³ Ñehua, yeñoteñ ñeñt̃ atto shellcapechyesane't cornesha' acheñesha' cabra po'rraso amapa' huaquesh po'rraso amapa' huacshetoll po'tsapñero ñeñt̃ a'poyenet altaro, ñeñt̃pa' attoña a'pocatenan ama't erra'tsena acheñer po'chets Partsocop, ama't erroteno a'sosyatena Partsocop. ¹⁴ Tarraña ñeñt̃pa' e'ñe po'chtsochaya a'pocatarettenet Partsocop. Tarraña allempo ashataretta Cristo po'rras, ñeñt̃pa' ellonet añecopña nanac sherbos attoch a'pocaterney ama't ñeñt̃ atet yoctape'chyen yeyochro. Ñeñto'marña allempoteña' amach alla yeyemtererro ñeñt̃ atet yeye'chcatyen arr patsro ñeñt̃ ama a'queshpatañeyeye. Añcha'ña e'ñe cohuen yesherven Yompor ñeñt̃ ama arromñateshayeye. Cristopa' ñeñto'marña ello atarr sherbeney atto pomuerra ñañeña o'ch rroma yocop ama't ñapa' ama eñalle po'chñar ama't e'ñe mamesha. Ñeñt̃pa' e'ñe Yompor Puecamquëño't

atet p̄osa; ñeñña Camuecñetserpa' ama ahuañaño.

15 Atto Jesucristopa' ña eñosets yocop attoch a'pocatuerrnay e'ñe cohuen etserra. Tarro'mar allempo rroma Cristo ñeñtpa' añecopña sherben attoch peretna'huerrnay yo'chñar ñeñt o' allpon yeḡohuen ahuatoteñ allempoteñ yoc'ta'nom ñeñt ñanom a'pocatañtatsañ. Allochñapa' allohueney ñeñtey o' ya'hua'ñare'tterra o'ch yame'ñera, ñapa' aphuerreycha' ñeñt o'patatenya ñeñt atet oteney attochña yapa' corretsayach errponohuañen. 16-17 Ñehua, yeñoteñ arr patsro ḡocma eñall puesheña'tets acheñ ñeñt atet petsa o'ch quellca'nman ñoñets all oten ñeñtcha' allpon puechatsreḡhno apa'nman pamo'tsesha' ñerra'm esempoch rroma. Tarraña allempo orameñ correna ñeñt quellquene' e'ñe ña po'ñoñ, añña ñeñt o'patatyenapa' amach erroteno't amnatareteto o'ch yoret e'ñe allempocma. Tarraña ñerra'm esempoch eñoteñet po'ñoch o' rromuen ñeñt o'patatenahuet, allempoñapa' apare'tetyesetcha' ñeñt allpon o'patataretetyenet. (Ñeñto'marña yapa' yeñoteñ allempo rroma Cristo atto ashataretta po'rraspa' ñeñt allpon o'patatenya yanña ñeñtpa'cho'ña e'ñe yocma.) 18 Ñeñto'marña ahuat allempo ñenmañ a'pocatatete't Partsocop, ama't allempopa'cho'ña o'ch muetset eyarra, po'rrasoñapa' allochña shellcata'tyeset. Ñeñtpa' attoña e'ñe a'pocatatete'tña po'ñoñ. 19 Ñehua, Moiséspa' atet p̄a allempo. E'ñe eñotatuan acheñenesha' ora allpon atet oten Yompor po'ñoñ ñeñtcha' atet pet, allempoña ñapa' o' yoran

carrnero pue'ch ñeñt e'chomaret tsama'to ñeñtña'pa' huanquë' hisopoch puetacro, allo'tña'pa' yoran ñaña huacshetoll po'rras ñaña cabra po'rras, tsech epuet oñ. Allña e'choman carrnero pue'ch ñeñt huanquën tsachpo allempoñapa' shellcata'tan allo libro ñeñt all anaret Yompor po'ñoñ, attoña shellcana'tam'pesuan ñaña allohuen acheñenesha'. ²⁰ Allempoñapa' atet otan acheñenesha': "Añ po'rras ñeñt'pa' alloña Yomporpa' a'pocstatennas ñeñt atet nenan po'ñoñ socop ñeñt'cha' atet sepa." ²¹ Ñaña attecma pan ñaña puerahua' ñeñt shetamtsopo' o' shellcapo'ch ñeñtara errasatso. Ñaña ora allpon coyme'chno ñeñt allo'tsa'yen allecma sherbeñet Parets, ñeñt'pa'cho'ña e'ñe shellca'ta'tue. ²² Ñehua, yeñoteñ ñeñt atet oten ñoñets ñeñt atet anaret, allohuen es po'rrasochña e'ñe a'cohuentatenet Partsocop. Allohuen pa'namen ñeñt allo'tsa'yenpa' e'ñe autsa allohuen a'cohuentatue atto ashellcana'taretta eyarra po'rraso. Ñeñto'marña yeñoteñ ñerra'm ama es muetseneto attoch shatatoñet po'rraspa' amach eseshaye' a'pretnarettetso po'chñaret.

Atto amtsaretta Cristo yo'chñarecoppa' attoña e'shohuerrnay yo'chñar

²³ Ñeñto'marña yeñoteñ a'ne patsro puerahua'pa' eyarra po'rrasoña a'cohuentatyenetña allohuen ñeñt Partsocop. Ñeñt puerahua' añ patso'marpa' añ toma'ntena Parets po'prahua' ñeñt pue'ntaño'tsen, ñeñt'pa'cho'ña attecma errasatso a'cohuentatarettena allohuen ñeñt allpon allo'tsa'yen. Tarraña ñeñt rromats Parets

po'prahuacop ñeñt̃ pue'ntañ'o'tsen ñeñt̃pa' añ muenen errasats ñeñt̃ ello atarr cohuen sherbets. ²⁴ Ñeñt̃o'marña Cristopa' ñeñt̃ecopña rroma. Tarro'mar Cristopa' ama arreye' be'tosuerro ñeñt̃ patso'mar puerahua' ñeñt̃ yečcaten acheñ ñeñt̃ atta toma'ntenaya Yompor po'prahua' ñeñt̃ pue'ntañ'o'tsen. Allña be'tosuerrña Cristo Parets po'prahuo ñeñt̃ pue'ntañ'o'tsen ñeñt̃o'marña te' ñapa' allo'tsen e'ñe allohuanen Yomporesho allña torra'huerra cohuen yocop. ²⁵ Ñaña Cristopa' ama atteye' p̃oso atet̃ pena cornaneshachno ahuat̃. Ñetpa' čhocma be'tosete't̃ allohuanen Parets po'ponro e'ñe pate'tets char. Ñaña errasats ñeñt̃cha' anenet o'pono ñeñt̃pa' ama ñetoyaye po'rraset. ²⁶ Tarraña Cristopa' e'ñe parrochepa anaret̃ o'ch pomuerra ñañeña o'ch rroma attoch ashataretta po'rras. Tarro'mar ñerra'm ama atteye' anareteñepa' čhocmate' rromame'tañ ama't tarrempoteñ allempoteñ e'ñe errte' ayečcatarettetsa pats. Tarraña ñeñt̃pa' ama atteye' p̃o. Ñapa' añecopña huapa attoch e'ñech parrocha amsarett̃a allohueney yo'chñarecop attoch ñachña yahuanmañperre' yo'chñar. Ñeñt̃o'marña huapa allempohuach čherr yet̃ allempoch mellapoterrmocha. ²⁷ Yeñoteñ ama't allohueney acheñey čhocmach yerromuen. Tarraña e'ñech parrocha yerroma allempoñapa' o'ch huernnaya attoch Yomporpa' eñotatyesserrey e'ñe errotencha' entyesserrey — ñato' e'ñech cohuen entyesserrey amapa' ñato' amach cohuenaye' entyesserrey. ²⁸ Attecma p̃a ñaña Cristo e'ñe parrocha rroma allempo

amtsareṭta allohuen ochñartsocop. Attoña ñapa' e'ñe ahuanmamperrey shontey allohueney yo'chñar. Ama't amtsareṭtañ ochñartsocop, ṭarraña Cristopa' allach orrterra po'pocheño. Allempoch huerra po'pocheño'pa' po'cohuenño amach añecpaye' huerro o'ch alla rromuerrerr ello ochñartsocop. Añecopcha'ña huerra po'pocheño o'ch e'ñe a'queshṭatuerran allohuen ñeñṭ chocma cohuenē' ña.

10

¹ Ñeñto'marña yeñoteñ Moisés po'ñoñ ñeñṭ atet anareṭ ahuat judioneshacop, ñeñṭpa' ama e'ñeye' cohuenteno ñeñṭ atet cohuentena te' ñeñṭ orrtatosnay Cristo. Añ ñoñets ñeñṭ atet anareṭ ahuat ñeñṭpa' aña toma'tena ñeñṭcha' e'ñe po'ñoçh cohuenetuerrtsa ñeñṭcha' orrterrtsa tsapatonet. Ñeñto'marña añ ñoñets ñeñṭ atet anareṭ ahuat ñeñṭpa' amach errotenoṭ a'cohuentatanoña acheñenesha' ama't puesheñarra ñeñṭ muenenayeñ o'ch yemtenanañ Yompor. Ama't chocma muetsa'yesetañeṭ eyarraçhno po'chñarecop e'ñe atet oteneñ añ ñoñets ñeñṭ atet anareṭ, ñeñṭpa' amach errotenoṭ e'ñe a'cohuentatanoña acheñenesha'. Ama't pate'tets char chocma muetsa'yesetañeṭ ñeñṭ Yomporecop, ñeñṭpa' ama e'ñeye' a'cohuentataneṭeña acheñenesha' Yomporecop ama't puesheñarra ñeñṭ muenenayeñ o'ch yemtenanañ Yompor. ² Ñerra'm e'ñe po'ñoçh a'cohuentatenaneñña acheñenesha' eso'marte'ña o'ch alla muetsereterrña po'poñeçhno shonte' eyarra. Ñerra'm po'ñoçh a'cohuentatenaneñ

acheñenesha' ñeñt atet cotape'chyene' sosya'tsañ pueyoçhreto, eso'marte'ña alla yerpapa'taterranete'tña po'chñaret ñeñt pueyoçhro'tsa'yenet. ³ Tarraña po'ñoçh epaye' yerpapa'taterranete'tña po'chñaret. E'ñe pate'tets char allempopa' o'ch alla muetserreterr eyarraçhno añecop ñeñt atto yerpapa'taterraneterr po'chñaret. ⁴ Ñeñto'marña yeñoteñ eyarra po'rraspa' amate' errotenoť ahuanmanperryeña yo'chñar ama't toro po'rras amapa' cabra po'rras.

⁵ Ñeñto'marña Cristopa' atet otosan pompor allempo acheñetos arr patsro ñeñtpa' atet ot: Pa te'pa' ama añeye' pemneno eyarra ñeñt amtsarettetsa p̄ocop ñeñtcha' atarr p̄ocshatene'. Ama't ñaña ñeñt es apa'yenet p̄ocop. Ñeñto'marña nocop te'pa' o' peyeçhcatuerrnan nechets añ patsrecop ñeñt e'ñe atet pemnen p̄a, e'ñech nechtsot nesherb̄osep̄ attoch e'ñe cohuen nocshatenep̄.

⁶ Po'ñoçh te'pa' ama añeye' atarr p̄ocshatenaye atto chamuenet eyarra p̄ocop amapa' allempo muetsanatenet eyarra ñeñt po'chñarecpuet.

⁷ Ñeñto'marña Nompore te' napa' o'ch notaḡ: "Napa' añecopña nohuapa arr patsro attoch netsotosnaḡ ñeñt atet pemnen p̄a, ñeñt e'ñe atet anareť peñoño nocop." Arrpa' allohua atet otan Cristo pompor.

⁸ Ñehua, ñeñt atet ot Cristo arr ñeñtpa' atto Yomporpa' ama añeye' mueneno eyarra ñeñt amtsarettetsa ochñartsocop attoch coshateñet

ña. Ama't ñaña ñeñt̃ es apa'yenet ñocop ñeñtpa'cho'ña ama ñeñteye' e'nen ñeñt̃cha' coshatene' ama't ñeñt̃ achamaret̃ ñocop ama't ñaña ñeñt̃ amtsarettetsa ochñartsocop. Ñeñt̃ ora añechno ñeñt̃ atet̃ nane't̃ Moisés po'ñoñ atet̃cha' es apueñet̃ Yompor, te'ña ñeñtpa' ama coshatenano Yompor; atet̃ oten Cristo. ⁹ Elloña ñapa' atet̃ oten, "Napa' añecopña nehuapa Nompore, o'ch netsotosnañ ñeñt̃ atet̃ pemnen ña." Ñeñtpa' añ eñotatosey, ña a'huañatose' ñeñt̃ ahuañoteñ atto muetsete't̃ eyarra po'chñarecop. Attoña ñapa' nosan po'ñoñ ñach rromosets yo'chñarecop. ¹⁰ Ñeñto'marña Jesucristopa' pomosa ñañeña yo'chñarecop. Ama't parrocha rromapa' ñeñtpa' allohuenacpay. Atto ñapa' etsotenan ñeñt̃ atet̃ muenen Pompor yañapa' e'ñe a'cohuentaterrey Partsocop. ¹¹ Ñaña ñeñt̃ cornaneshatyets judioneshacop ñet̃ pate'tets yetpa' chocma tenet̃ all altaro allotecma sherbeñet̃ Yompor allecma muetsanaterretañe't̃ eyarrachno ñeñt̃ ochñartsocop. Tarraña ama't amtsarettenañpa' amach erroteno't̃ ahuanmanoña ochñarets. ¹² Tarraña Jesucristopa' e'ñe parrocha pomuerra e'ñe ñañeña ñach amtsare'tterrtsa ochñartsocop. Ama't parrocha rroma ñeñtpa' allohuenacop e'ñech errponohuañenacop. Allempoñapa' o' alla anorruerr Pompor po'cohuenro't̃ allña partsotuerr. ¹³ Alloña cohuenan allohuen ñeñt̃ e'moñe'tene' esempohuañenpa' a'mchechatuerranetcha'. ¹⁴ Jesucristo allempo pomuerra ñañeña, ñapa' e'ñe etsotatuerrnay attoch e'ñe a'cohuentaterrey Partsocop. Ama't

parrocha rroma ñeñtpa' e'ñe allohuenacop ama't ahuaťoteñ errponohuañenacop añecop ñeñt pueyochresha' pen Parets. ¹⁵⁻¹⁶ Ama't Yompor Puecamquẽ ñeñtpa'cho'ña eñotochtatennay țarro'mar ñapa' añ eñotatyet' ñeñt atet otyet' Yompor, ñeñtpa' atet ot:

Esempohuañenpa' napa' o'ch na'pocatterranet po'pocheño. Ñeñtpa' atetcha' neperranet. Allempo esheccha'ña nechapaterranet neñoñ e'ñe pueyoçhreto. Ñeñtpa' ñato' o'ch netma'ntacha atto neñoñpa' o' aquellcaretterret e'ñe ñet pueyoçhreto ñeñtcha'ca'yeña cotape'chaterrahuetña e'ñe cohuen.

¹⁷ Ellonetpa' atet ote't allempo:

Napa' amach alla neyerpuerranete'te po'chñaret. Ama't ora atto atpare'tnete'tpa' amachña ñeñta alla neyerpuerranete'te.

¹⁸ Ñeñto'marña yeñoteñ atto Yomporpa' o' peretna'huerrnay yo'chñar amach alla yerpuerrnaye'te ñeñto'marña amach alla es yemtserre'te ñeñt yo'chñarecop.

Te'pa' ama es palltetso yocop attoch e'ñe cohuen ye'ñorana'tera Yompor Parets

¹⁹ Ñeñto'marña masheñeshacha' ñaña noçhaneshacha' te'pa' yeñoteñ e'ñe pocte' yocop e'ñe ya yeçhore'teñoť Yomporpa' e'ñech yeyemteña e'ñe atet ñerra'm yamo'ts yeyemtena e'ñe allame'tets. Ñeñtpa' añ toma'ntena ñerra'mrrate' o' yebe'terr e'ñe allohuanen Parets po'ponro all po'prahuo atet pe't ahuať cornaneshá' ñeñt be'tostse't ñapueť ñeñt anmayet'

eyarra po'rras all, tarro'mar te'ña atto o' rroma Jesucristo yocop, po'rrasña ñeñña e'ñe ya'pochtaterre'ña ya attoch ye'ñorana'tera ama't ñeñt atarr Parets. ²⁰ Po'ñoçh Jesucristo e'ñe ña po'chtsoť orrtaterrnay po'poñ etserra attoch yapa'cho'ña o'ch yeçhapanpera Yompor attoch ye'ñorana'tera. Ñeñtpa' e'ñe cohuen attoch yeyemteña e'ñe po'ñoçh. Ñeñtpa' añ toma'ntena ñerra'mrrate' Cristopa' o' çhapterrey allohua yottañpeññañet besmo Parets po'ponro all po'prahuo. ²¹ Jesús te'pa' yeñoteñ ñeñña atarr Yecorneshar yepen ñeñt çhets Yompor pa'paclo, ñapa' allña añcha'taretetuerra Yompoprepahuo añecop allohuen ñeñt pueyochreshaçhno pen Parets. ²² Ñeñto'marña e'ñe yeyemteño'pa' amach yemcha'nañoñayaya yeçhore'teñe. E'ñepa'chña yeñmañesha' yeyoçhrocmañen yeçhore'teñ, tarro'mar Cristo po'rrasoña o' a'cohuentaterrnay yeyoçher atto te'pa' o' e'ñe cohuen yoctape'chyerr, amachña allo'na yerpapa'tatnenye yo'chñar. Ñeñtpa' añ toma'ntena atto yapa' e'ñe cohuen apatare'tey oño ñeñt poctetsa Partsocop. ²³ Chocmuepa'chña yecueñña ñeñt yeyemtena allochñapa' a'queshpaterreycha', amuepa'chña çha ye'charrtatstenoña yeyoçher tarro'mar Yompor ñapa' çhocmach a'pochtaterrnay po'ñoñ ñeñt atet oteneý. ²⁴ Ñaña añepa'chña e'ñe cohuen ye'nen attoch yeyenpanna allohueney allochñapa' attoch e'ñe cohuen yeyçhen morrentanna'teñets ñaña e'ñech cohuen es yeyenpanna. ²⁵ Ñaña çhocmuepa'ch yesen all çhocma yapçhena e'ñe yame'ñeñoť Cristo.

Amachña atfa yeřatsto ñeñt atet pena po'potantañ ñeñt ama huetso allecma yapčhena. Añcha'ña atet yepena allempo yapčhena e'ñech cohuen yoctape'chatannena Yomporecop. Elloña te'pa' čhocmach yapčhena ñeñt nanac cohuentetsa yocop țarro'mar yeñoteñ te'pa' o' čherrmoch allempoch huerra Yepartseshar Cristo.

²⁶ Tarro'mar ñerra'm o' yeñoter po'ñočh Cristo rromats yocop attoch a'queshřaterrey ñaña ñerra'm ñeñto' yame'ñerra țarraña ñerra'm allo'na yesen ochña'tare'tnomuets e'ñe ya yemneñño'pa' allempopa' amach eñalleña ñeñtcha' rromuerrtserr po'pocheño ñeñtcha' yetsa'terroyerr ello yo'chñar. ²⁷ Ñeñt allo'na sets ochña'tare'tnomuets añach o'paterrahuet coñcheñets ñeñt atarr amcha'nočhtetsa ñeñtara Yompör po'yoročhenña ñeñt tso'pa' e'ñech e'nuerran allohuen ñeñt e'moñe'tene' Yompör.

²⁸ Ñehua, ahuať ñerra'm eñall ama't puesheñarra ñeñt atpare'taye't Moisés po'ñoñ, ñerra'm eñall epsheña amapa' ma'psheña ñeñtcha' a'metam'pene' ñeñtña atparña'pa' ahuo'ch muetse allohuen acheñenesha'. Ama't puesheñarrapa' amach eñalleña ñeñtcha' morrentaya. ²⁹ Elloña ñeñt ama esoye' entenaye Yompör Puechemerpa' atarrcha' nanac a'coñchatare'tterret. Elloña po'rras ñeñtcha' a'cohuentaterrahuetañ Partsocop ñeñt'pa'cho'ña ama esoye' enteñeto ama't ñeñt errasatser ñeñt etserra a'pocatañtetsa. Elloña ama't Yompör Puecamquëñ ñeñt'pa'cho'ña čhach sasare'teññañet ñeñtara Puecamquëñ ñeñtcha' morrenterrahuetañ attoch chorrerranetañ.

Ama't seño'teñeña elloña atarrcha' nanac
 acoñchatare'terra ñeñt atet atarr tsena'tene'
 Yompor Puechemer. ³⁰ Tarro'mar yapa'
 yeño'teñ Yomporña atet otets: "Napa'
 ñeñtencha' coñchaterahuet, napa' ñeñtencha'
 tsa'taterrahuet." Elloñapa' atet oten Yompor:
 "Napa' ñeñtencha' otteñe'cherrahuet attochña
 necoñchatteranet ama't ñeñt neyochreshachno
 nepeneñ." ³¹ Ñeñto'marña yeño'teñ atarr
 yoro'cheno'tsen ama't allohuen ñeñt aña
 o'patenaya ñeñt po'yoro'chenña pen Yompor ñeñt
 ama arromña'teshayaye.

³² Tarraña te'pa' o'ch notas, o'ch alla
 seyerpuerra atet sepa ahuañmo'cha allempo
 e'ñe errtes eñoterre' po'ño'ch Cristepa'tña
 a'queshpatañ. Ñeñtpa' allempo ñanom
 a'puetarsam̄psaretta seyo'chro soctapña.
 Allempopa' ama't atarr amuero'chtatare'teseñ
 sañapa' e'ñe sa'huan'ta'huanom pa'namen
 topateñtso'chno ñeñt setantyesoya; ñeñtpa'
 e'ñe atet ñerra'mrrate' sapa' cho atarr
 se'cllarena. ³³ Patanta'ttsospa' atarrca'ye
 che'tatsetasete't e'ñe allo'tsa'yen allohuen
 acheñenesha'. All atarr sa'muero'chtatare'tta.
 Elloña ñerra'm esempo muero'chtateñet
 po'potantañ samo'tsesha' sapa'cho'ña chocmach
 semuero'chtapretanete't. ³⁴ Po'ño'ch ñeñt
 arrmanatare'ttase't o'ch ayottam̄psare'ttet,
 sañapa' e'ñe sellcapreteño'fanetpa' chocmach
 e'ñe cohuen seyenpuenanet. Ama't allempo
 puerratam̄psatsre'tase't ñeñt se'moñe'tyesaye't,
 sañapa' e'ñech socsheñesha' sa'huantenanet.

Tarro'mar sapa' señoñeñ o' secherr ento ñeññ atarr sherbets ñeññ ello metana'tuene' atto sherbenes sechatser, tarro'mar ñeññpa' ama aptsaño. ³⁵ Ñeñño'marña masheñneshacha' o'ch alla noterrser, amach alla sequeçhpatsterrñañe ñeññ atto atarr seyemteña Cristo tarro'mar Yomporpa' ñachña atarr cohuen setsa'terraya. ³⁶ Te' sapa' aña sepalltena attoch e'ñe acoña sa'huantha' huanom ñeññ atarr echarr sentyen, attochña allo'nach sesen pa'yesnomue' ñeññ atet muenen Yompor, attochña Yomporpa' apuerrescha' ñeññ e'ñe atet otenes. ³⁷ Tarro'mar yeñoñeñ Yompor po'ñoñ ñeññ aquellcareñ ahuatoteñ ñeññpa' Cristocop atet oten: O' mameshamerra o'ch orretuerra ñeññcha' huer-rtsa, te'pa' amach alla atomato pue'ntaño.

³⁸ Tarraña Yomporpa' atet oten:

Ñeññ e'ñe pocte' nenten na ama't erra'tsena acheñer tarro'mar e'ñe pueyemteñoñen na, ñeññña' corretsach. Tarraña ñerra'm esesha' nepuerrañperraya ñapa' o'huañcha' allo'na coshatenen.

³⁹ Tarraña yapa' ama atteyayye ñerra'mrrate' ñeññcha' puerrañperraya Yompor ñeññcha' chenquërrtsa. Yapa' añeyca'yeña ñeññeycha' çhocma yemterraya Yompor ñeññeycha' a'queshpataretterrtsa e'ñe yecamquëñoñhuen.

11

E'ñe yeyemteñoñ Yomporpa' e'ñech cohuen es yet-sotayen ñocop

¹ Ñehua, allempo po'ñoçh yeyemteña Yompor e'ñe yeñoñeñ çhocmach apuerrey ama't esempo

ñeññ atarr yecuen te' e'ñe yenamueñoñ. Ama't ama yenteña' e'ñe yeyoçhroña yeñoteñ ñeññ yecuen te' po'ñoçhpa' apuerreycha' ama't esempo.
² Yatañneshañ ahuatpa' atarr yemuetyesete't Yompor. Ñeññ atto yemuetyesyete't Yomporñapa' e'ñe pocte' entyesanete't.

³ Ñaña ya e'ñe yeyemteñoñ Yompor te'ñapa' o' yeñoter allpon ñeññ yentyen arr patsro ñeññpa' e'ñe po'ñoñoña yeçhca'hua. Allempopa' ama't coñe'ta ama es orrtetso ñeññcha' pa'namen yeçhcatyes ñeññ atet yentyen te'.

⁴ Ñaña Abel ahuat atto yemtane't Yompor, ñapa' apan Yompor ñeññ atarr coshate'. Pa'mo'nasheñña Caín ama't apaneñ ñaña Yompor, ñeñññapa' ama coshatano Yompor. Ñeñño'mar Yomporpa' e'ñe cohuen agapan ñeññ aþ Abel; attoña Yomporpa' eñotatanet e'ñe pocte' entapretan Abel. Tarraña Abel ama't rromañpa' atto atarr yemtane't Yompor, ñeññpa' e'ñe teme'ttsen eñotateney ñeññ cohuen enten Yompor. Ñeññpa' attema't ñerra'mrrate' Abelpa' teme'ttsen serrpare'tateney cohuen.

⁵ Ñaña ahuat Enoc ñeññ atarr cohuen yemtaye't Yompor, ñapa' e'ñe ora aner Yompor pue'ntaño e'ñe beñnaoñ. Ñapa' ama çhoye' rromo arr patsro. E'ñe atfa a'chencach pamo'tsesha' ama esesha' enterraye tarro'mar Yompor erraya'. Ñehua, allempo ama a'tapatera' Yompor pue'ntaño ñapa' atarr cohuen coshatane't Yompor allempo añe patsro'tsen, tarro'mar ñeññpa' atet oten Yompor po'ñoñ ñeññ aquellcare't. ⁶ Ñerra'm ama

yeyemteñe Yompor amach errotenoť yocshateñe ama't e'ñe mamesha. Tarraña ñerra'm esesha' muenene' o'ch yemteret ñamet Yompor añ poctetsa o'ch otet po'ñočhpa' Yomporpa' eñall, ñaña eñoteretepa'chña Yomporpa' čocmach coshaterran allohuen ñeñť e'nene' ña. ⁷ Ñaña ahuat Yomporpa' eñotatan Noé ñeñťcha' atet e'chořan oñ tsapatoneť. Allempo atet otan Noé ama't mameshapa' ama huate'te. Tarraña Noéñapa' e'ñe yemtenana atet och Yompor allempo. Ñaña'pa' yečhcaturan po'compuer allochñapa' attoch a'qeshřatan pamo'tsesha'. Atto yečhcaturan po'compuer e'ñe ñapueť e'ñe pueyemteñoť Yomporpa' eñotatanenñña allohuen po'potantañečhno pamo'tsesha' ñetpa' coñchatuerranetcha' Yompor. Ñeñťo'marña e'ñe pueyemteñoť, Yomporñapa' e'ñe pocte' entenan Noé.

⁸ Ñaña ahuat Abrahampa' allempo chore'ch Yompor o'ch mueñe allařar allcha' apuer pats, ñaña'pa' e'ñe pueyemteñoť Yompor e'ñe cohuen ame'ñya. Allempoñapa' sa'nman pa'netser o' ahuo' ama't ñapa' ama eñoteñe allcha' ta tarro'mar ama puentare all sen. ⁹ Allempo čhap anetso all oteñ Yompor ñeñťcha' apuer esempohuañen, allñapa' all yečhosa e'ñe pueyemteñoť Yompor. Tarraña ña allpa' atta yečhosa atet ñerra'm ahuařña. Ama't ñeñť patspa' ñeñť o'patateña Yompor ñeñťcha' apuer, tarraña allempopa' ama apueña' Yompor ñeñť atet oteñ. Ñeñťo'mar ñapa' atta shetamtsopo'tos all manatoset. Ñaña ama't ñeñťcha' po'mřeneñ perr Isaac ñaña Jacob

ñetpa'cho'ña attera yeçherret shetamtsopahuo. Ñetpa'cho'ña atta cohueñet esempohuañencha' apuerranet Yompor ñeñt patser e'ñe atet otenanet ñamet. ¹⁰ Abraham po'ñoçhpa' aña cohuen ñeñt Yompor pa'netser ñeñt e'ñe echarr aparet tarro'mar Yompor yeçhcatene' e'ñe echarr peñ.

¹¹ Puetapor Sarapa'cho'ña e'ñe pueyemteñoñ Yomporpa' cheyore'terr ama't ñapa' o' atarr po'nme'ten. Ama't o' meten allempo atto cheyore'ten coyanesha' e'ñe pueyemteñoña Yomporpa' ña ahuamencañ pe' attoch cheyore't. Tarro'mar ñapa' atarr ayemuetpo' entenan Yompor atet oteñ. ¹² Attoña e'ñe Abrahamoña atarr mererra shonte' acheñenesha' nanac ama't ñapa' o' atarr nanac po'nme'ten allempo. Allpon acheñenesha' ña e'ñe po'mreneñ pohuenahuet ñeñt allpon shonte' nanac atet ñerra'mrrate' ora allohuen rantoçhno ñeñt ento'tsa'yen ñaña atet yenteññañ sa'p po'mñer ñeñt ama e'ñotuapahuoyaye.

¹³ Ñeñtet allponet atarr yemuetnomuet Yompor ama't allempo Yomporpa' ama apuenaneta' ñeñt patser ñeñt o'patatanete't. Tarraña ama't ama aparetterreta' ñeñt patser ñeñt o'patatanete't Yompor, ñetña'pueyemuetneñoñet Yompor eñoteñet ñetpa' aparetterretcha' ñeñtcha' po'ñoçh pa'netser perret. Ñeñtcha' atarr coshaterrahuet. Tarro'marña ñetpa' eñoteñet añ patser po'ñoçh ama pa'netsreye' peñeto. Ñetpa' ahuapañanesheta entenet arr patsro.

¹⁴ Ñehua, yeñoteñ acheñ ñeñt atet entetsa ñerra'm ahuapañanesheta ñetpa' aña e'nenet

ñeñtcha' e'ñe pa'netser perret po'ñoçh. ¹⁵ Ñaña ama añeye' pa'netser peneto allot onet tarro'mar ñerra'm ñeñta e'nenetañpa' po'ñoçhpa' o'ch alla puerrerretañ allot onet tarraña ñetpa' ama ñeñteye'ña e'name'teneto. ¹⁶ Ñetpa' añña e'nete't ñeñtcha' e'ñe pa'netser perret po'ñoçh ñeñt atarr nanac cohuen, ñeñtpa' añepa't Yompor pa'netser ñeñt pue'ntañ'o'tsen. Ñeñto'marña Yomporpa' e'ñe pocte' entenanet ama penquënaneto atto Po'yomporer peñet. Ñaña'pa' o'patatenanet ñeñtcha' e'ñe po'ñoçh pa'netser perret all pue'ntañ'o.

¹⁷ Ñaña allempo Yomporpa' atarr topatan Abraham; ñeñtpa' atet otan Abraham: "Te'pa' o'ch pemtser pechemer Isaac e'ñe atet ñerra'm ñeñt muetsenet nocop." E'ñe pueyemteño't Yompor Abrahamña'pa' e'ñe pocte' eñch o'ch poman puechemer Isaac o'ch muetse Yomporcop. Ñehua, Yomporpa' atet o' otuan Abraham ahua'toteñ: ¹⁸ "E'ñe pechemereshot Isaacpa' mererrach shonte' acheñenesha' ñeñtcha' e'ñe pen'reneñ peperr." Tarraña ama't atet oteñeñ Yompor, ñaña'pa' e'ñe pueyemteño't Yomporpa' e'ñe pocte' eñch ahuo'ch muetsan po'patrro' allempo atet otererr Yompor. ¹⁹ Tarro'mar ñapa' atet oten, Yomporpa' atarr ahua'mencatesha' ñach tantatuerre' ama't ñeñtcha' rromats. Ñeñtpa' atet ñerra'mrrate' Yomporpa' o' alla tantaterrñañ puechemer rromot, o' alla agapuer pompor po'pocheño.

²⁰ Isaacpa'cho'ña allempo po'n e'ñe pueyemteño't Yomporpa' enaman puechemere-

shacop Yompor pa'nateña añecop Jacob ñaña Esaú; ñeñtcha' atet bensare'tam'perranet tsapatonet. ²¹ Jacobpa'cho'ña allempo rromamoch e'ñe pueyemteñoť Yomporpa' enam-atnoman Yompor pa'nateña pue'ñareťolleshacop ñeñť puechemer José puechemeretollesha' puepo'nmeñoťpa' po'carra quellpuena allña ma'yochenanaña Yompor. ²² Josépa'cho'ña e'ñe pueyemteñoť Yompor allempoch rroma allařar all anetso Egipto, ñapa' atet otnoman pamo'tsesha': "Po'ño'chpa' čhocmach čhap allempoch allohuenes israelena'tarneshas seča'nerrcha' arroť Egiptoť, o'ch sahanerra allo'tsen pats ñeñť o'patatye't ahuatoteñ Yompor ñeñtcha' apuerrey. Ñaña ñerra'm esempoch ahuerres arroťpa' sanerrnancha' nenpa'ts."

²³ Ñaña allempo eñalleta Moisés, pamo'mte'ñapa' e'ñe cohuenatoll entan ematoll. Ñetpa' e'ñe pueyemteñoťet Yomporpa' o' e'pochet. Ama mecha'teññañeto añcha'taret po'ñoñ ñeñť atet nen attoch čhocma muetsanachet allohuen asheñorroťollesha' ñeñť eñalletyetsa. E'ñe ma'pña arrorr alla e'poteñet. ²⁴ Tarraña Moisés allempo o' po'n ñapa'cho'ña e'ñe pueyemteñoťa Yomporpa' ama mueno o'ch oteñet ño' pue'ñar penña añcha'taret, tarro'mar ñapa' atta ñañreteña añcha'taret po'señ ñeñť egipto'marnesha'. ²⁵ Ñapa' añña e'ñe pocte' ent o'ch mueročtapretana israelnesha' ñeñť e'ñe pamo'tsesha' pen ñeñťara ñeñť pueyochresha'čno pen Yompor. Ama pocteye' entano o'ch coshapretana egipto'marnesha' ñeñť

atet yechenet ñeñt ama pocteye' enteno Yompor tarro'mar ñapa' eñoteñ ñeñtpa' e'ne mamecpa atet coshenet. ²⁶ Ñapa' atta ahuantenan atto atarr sasare'teñet israelnesha'. Tarro'mar ñapa' añ pocte' enten o'ch muerochta Cristocop. Ñapa' ñeñtña atarr cohuen enten, ello metana'tuenan ñeñt atet sherben allohuen ñeñt esocmañen ñeñt atarr morrentena egipto'marnesha'. Tarro'mar ñapa' añña cohuen ñeñtcha' apuer Yompor ñeñtcha'ña atarr coshaterre'.

²⁷⁻²⁸ Ñeñto'marña Moisés e'ne pueyemteñoñ Yomporpa' atet otan allohuen israelena'tar ñeñt Egipto'tsa'yen: "Te'pa' o'ch semtsa carrnerotoll tarro'mar Yompor otets. Ñeñtña po'rraspa' o'ch seshellcata'tyes allot sebe'ten so'ponro, allochñapa' ñerra'm esempoch huapa mellañoñeñ ñeñt amñareñ ñeñtcha' muetsanatuenaya' allohuen egipto'marnesha' po'mo'ternesha' attochña sa ñeñtes israelena'tarneshaspa' ama't puesheñarrotesapa' amach muetsenso." Ñaña Moisés e'ne pueyemteñoñ Yomporpa' sa'nerran anets Egipto, ama mecha'tnomano ñeñt añcha'tarettetsa all Egipto ñeñt atarr atsrre'mñañ. Moiséspa' atta ahuanta'huanman allohuen ñeñt atarr echarr entyen tarro'mar ñapa' añ e'ne yemtena Yompor ñeñt ama't ama entpahuoyaye.

²⁹ Ñaña allempo onacherr allohuen israelena'tarnesha' Egiptoñ allempo cha'cha'tet atarr sa'po ñeñt otenet Sa'p Tsasasen, israelena'tarnesha' e'ne pueyemteñoñtet Yomporpa' e'ne atta ahuanmoset all chope'chnomuet atet ñerra'mrrate' e'ne

porrare' patso chope'chenet. Egipto'marnesha'ña ñeññ coťahuetañpa' ñetpa'cho'ña ahuanmosetañ ñamet all sa'po, țarraña ñetñapa' e'ñe allohuenet ño'shrra'tuoksetña all oño.

³⁰ Ñaña allempo čhača'tet all anetso Jericó ñeññña allo'marnesha'pa' ama mueneñeto o'ch abe'tosam̃psarettet. Tarraña israelena'tarnesha' e'ñe pueyemteñoťet Yomporpa' cančherrmatoset; o' cančhroch puetesam̃psame'toset ñeññ anetser Jericó ñeññ atet otanet Yompor. Allempoña e'ñe pueyemteñoťet Yomporpa' ñeññña cončhet allo aconča'tam̃psareť ñeññ anetser all puetesme'tet cančhroch e'ñepa'tcha' ñoťa mata'nom. ³¹ Ñaña Rahab ama't ñeññ atarr ecañoreshaťtatse't ahuatpa' atto atarr yemterrana ñaña Yompor, ñeññ coyanesharpa' ama rromo allempo a'cllatareťta allohuen pamo'tsesha' ñeññara jerico'marnesha' ñeññ atarr atpare'tyesaye't Yompor all anetso. Tarro'mar ñapa' e'ñe cohuen agapan pa'paclo allponsheña israelena'tar ñeññ ñanom amñareťtatsa all anetso ñeññcha' eñotenaya' errotente'ña ñeññ anetser ñaña ñeññ yečhetsa all, ñato' ahua mencatarerette' ñato'pa' amate'.

³² Po'potantañečhnopa' shontemeñ ñeññcha' alla neyperpaterrsañerr ñeññ atarr yemtaye't Yompor ahuat. Tarraña ama eñalle allponmat yeť attoch alla neyperpatuerrsa allohuen ñeññ atarr yemtaye't Yompor, atet ñerra'm Gedeón, ñaña Barac, ñaña Sansón, ñaña Jefeť, ñaña David, ñaña Samuel ñaña allohuen ñeññ a'mta'yesaye't Yompor po'ñoñ ahuat. ³³ Tarraña allohuenet e'ñe pueyemteñoťet Yomporpa'

pa'namen etsotayenet ñeñĩ atet muenatenanet Yompor. Puesheña'ttsetpa' e'ñe a'mchechueñet po'potantañ añcha'tareñshachno ñeñĩ e'moñe'tenahuet. Po'potantaññapa' e'ñe pueyemteñoñet Yompor e'ñe cohuen añcha'tareñtenet. E'ñe pueyemteñoñet Yompor ñapa' alla yenpuerranet ñeñĩ atet otanete't. Ama't po'psheñeñpa' e'ñe pueyemteñoñ Yompor ama muenatano ma'yarr o'ch erroñ pe'. ³⁴ Ñaña ama't tso'ña ama't atarr huomenc huorten ama muenache o'ch atserrpe'. Po'psheñeñpa' e'ñe pueyemteñoñ Yompor ñapa' a'queshpach attoch ama muetseto espado. Po'potantañpa' ama't ama eñalleto po'huamenc, e'ñe pueyemteñoñet Yompor atarr ahuamencañ panet. Ñeñña huomencñatserpa' alloña quellarenet. Atto e'ñe a'mchechuet ñeñĩ e'moñe'tenahuet. ³⁵ Ama't po'potantañ coyaneshachno ñetpa'cho'ña e'ñe pueyemteñoñet Yompor, o' alla atantatareñterret pamo'ts ñeñĩ rromuets.

Po'potantañ ama't atarr atserrpãtse'tareñtenet, ñetpa'cho'ña e'ñe pueyemteñoñet Yompor ama mueneñeto o'ch quechpuet Yompor attoch a'rroyareñtetyerret. E'ñe pocte' enteñet o'ch rromuet pueyemteñoñet Yompor tarro'mar ñetpa' eñoteñet allach tanterret ello ñeñĩ atarr nanac cohuentetsa. ³⁶ Po'potantañechno ñetpa'cho'ña e'ñe pueyemteñoñet Yompor ahuanta'yenet pa'namen atto atarr atserrpãtse'tareñtetyesete't — attoña atarr ache'tatsetareñtete't, all ashtareñtete't, ehuancanatareñtete't, ay-ottamñpsareñtetyesete't. ³⁷ Po'potantañ

amtsanatareŧteteŧ atŧo arrollapechareŧteteŧ. Po'potantañpa' asheshareŧetyeseteŧ e'ñe puerroĉhreto atŧo amtsanatareŧetyeseteŧ, atarr huomenc huapaneteŧ topateñets. Po'potantañ espado amtsanatareŧetyeseteŧ. Po'potantañ atŧa chopeñe'chyeseteŧ, añã chorra'yeseŧeŧ carrnerorrom, ñãña cabrarrrom. Atarr huocchañetyeseteŧ atŧaña atarr amuerocŧatareŧteteŧ atŧo atserrpa'yeseŧteteŧ.

³⁸ Atŧa chopeñe'chyeseteŧ amayo'mar, aspenŧo'mar. Esho'tyeseteŧ arroroŧo'mar, mapuetpono'mar añe patsro. Allohuenet ñet ñeñŧ atŧo atarr amuerocŧatareŧteteŧ, Yomporñapa' atarr cohuen entaneteŧ. Ello metana'tueñet ora allohuen acheñenesha' arr patsro.

³⁹ Allohuenet ñeñŧet atarr yemteteŧ Yompor ahuat, Yomporñapa' e'ñe cohuen entaneteŧ, tarraña ñetpa' amaña enterretoña ora allpon ñeñŧ atet otaneteŧ Yompor ahuat ñeñŧcha' atet apuerranet.

⁴⁰ Tarro'mar Yomporpa' ama't ahuatoteñ añ cotape'chen ñeñŧ ello nanac cohuen enten ña. Ñeñŧpa' yocpa'na allohuenacpay. Ñapa' añ muenen allohueney parro o'ch etsotaternay ñeñŧ o'patatenya ñeñŧcha' e'ñe cohuen ya'cohuentaterre' allohueney.

12

Chocmuepa'chña e'ñe yeyemuetneña Yepartse-shar Jesús

¹ Ñeñŧo'marña yeñoteñ shonte' acheñ ñeñŧ orrtatyesayeŧ ahuatoteñ; e'ñe pueyemteñoŧet Yompor e'ñe etsotayeseŧeŧ Yomporecop ñeñŧ

atarr echarr. Ñaña ñet te'pa' o'ch netma'ntatanet ñerra'mrrate' allohuenetpa' o' cohuapreterryet yaña o'ch entyesyet errotencha' yetsota yaña ñeñt atet muenateney Yompor. Ñeñto'marña yocoppa' añ poctetsa o'ch e'ñe yesuanom ama't erra'tsena ñeñt yepatare'tene' ama't ñaña yo'chñar ñeñt atarr yetpatyene'. Ñaña e'ñepa'ch ya'huinta'huanom allohuen ñeñt echarr yentyen. Allochñapa' attoch e'ñe cohuen yetsoteññañ ñeñt atet muenateney Yompor. Ñeñtpa' e'ñe atet ñerra'mrrate' ñeñt matetsa ñetpa' chocmach chapuet allohua onañchare'tenet ñocpuet. ² Añcha'ña chocmuepa'chña e'ñe yeyemuetneña Jesús ñeñt orrtaterre' attoch yeyemtera ñaña ñeñtcha' yetsotaterre' ñeñt atto atarr yeyemuetneña. Tarro'mar ñapa' e'ñe pocte' eñche't o'ch ahuinta'huan allohuen ñeñt echarr ente't ama't atto rroma corsocho. Ama't ñeñt atarr apenco'chen entyenet, ñapa' e'ñe poctacma ahuinta'huanemñ. Tarro'mar e'ñe pueyemteñoña Pompor ñapa' eñoteñ ñach apapuerre' ñeñtcha'ña atarr coshatuerre'. Ñeñto'marña te'pa' o' alla anorruerr Pompor po'cohuenrot all anen po'conaño allña partsotuerr ñaña.

³ Ñehua, te' sapa' o'ch alla seyerpuera Jesús atto ñapa' atarr muerochtater ñeñt atarr ochña'tenesha' ñeñt atarr e'moñe'taye't. Tarraña ñapa' allohuen muerochteñetspa' e'ñe ahuinta'huanemñ. Allochñapa' sapa'cho'ña amach cha semuenme'chatsche ñeñtcha' atarr echarr sehuapoya, attochña amach cha llecatenso.

⁴ Tarraña saña ama't atarr satpare'tyeñeñ

atfo atarr topatase't so'chñar amaña choye' muetsenseto ñeñt atet aþaretta Jesús, ashataretta po'rras ochñartsocop. ⁵ Ñaña sapa' o'te' cha sepuesua ñeñt atet cotape'chateney Yompor po'ñoño allohueney ñeñtey puechemer pen. Ñeñtpa' atet oteney po'ñoñ:

Nechemere, ñerra'm esempo cotape'chaterres cohuen Yompor amachña atfa sentatsche ñerra'm ama esoye' sherbeno. Ñaña ñerra'm esempo coñchatas mame' attoch o'ch alla soctape'cherr cohuen amachña ñeñtofa cha muene' sequechpatstere. ⁶ Tarro'mar allohueney ñeñtey morrentena Yompor ñeñteycha'ña cotape'chaterr cohuen. Ñaña allohueney ñeñtey puechemerasha' pen ñeñteycha'ña coñchatyes mamesha'tets attoch o'ch alla yoctape'cherr cohuen ñocop.

⁷ E'ñepa'chña ya'huinta'huanom atfo coñchateney mame' tarro'mar ñapa' añ muenen o'ch e'ñe puechemer perrey poctacma. Ñehua, yeñoteñ e'ñe pocte' atfo ñeñt achemereshat errotenopa' o'ch coñchachet puechemer mame' allochñapa' attoch e'ñe cohuen ame'ñenanet puechemer. ⁸ Tarro'mar ñerra'm esesha' ama coñchatenaye mame' puechemer attoch e'ñe cohuen ame'ñachet ñeñtpa' po'ñoñ ama puechemereye' peñe; ñeñtpa' cha ottena ñerra'm ellapnanesha'. Ñeñto'mar sapa'cho'ña ñerra'm ama coñchatenso Yompor mame' attoch same'ñya e'ñe cohuen po'ñoñ amaca'ye puechemereye' penso. ⁹ Elloña yeñoteñ

allempto cheshenya' ñeñt̃ yompor yepen arr patsro atto e'ñe cohuen cotape'chatyesyete't, ñeñtpa' e'ñe pocte' yeñche't tarro'mar yeñoteñ ñeñtpa' e'ñe cohuen yocop. Ñeñto'marña te'pa'cho'ña e'ñepa'chña cohuen yenteñ atto Yomporpa' o' cotape'chaterrey cohuen ñeñfara Yompor ñeñt̃ pue'ntañotsen ñeñt̃ pamo'mte' pen yecamquẽñ attoña yapa' corretsayach. ¹⁰ Ñehua, ñeñt̃ yamo'mte' yepen arr patsro ñetpa' e'ñe allponmata cotape'chatyesyete't allempto yapa' cheshenya'. Ñetpa' chocma coñchatyesyete't allpon pocte' entyesete't ñet. Ñaña Yompor atto allpon coñchatyeney mamesha'tets ñeñtpa'cho'ña e'ñe cohuenacma yocop allochñapa' yapa'cho'ña e'ñech cohuenare' es yorrtatyen e'ñe atet ñerra'm ñapa' e'ñe cohuenare' es orrtatyen. ¹¹ Ñaña yapa' yeñoteñ ñerra'm esesha' yecoñchatene' ñeñtpa' ama cohuenaye' yenteñe e'ñe allempto coñchatenyet, tarro'mar ñeñtpa' chocmach llecatenyet. Tarraña puecoñchateño'fetaypa' o'ch yeñoterr ñeñt̃ atarr cohuen enten Yompor. Allochñapa' attochña e'ñech yocsheñesha' yeychena cohuen muechet.

*Ñato'tña atta es sepcham̃pena'ña ñeñt̃ atet anaret
Partseshot socop te'tña ama secherro ñesho*

¹² Ñeñto'marña te'pa' o'ch notas, o'ch alla setanterra o'ch alla sa'huamencaterra Yomporcop. Atetcha' netma'ntatasa atet ñerra'mrrate' o' alla ahuamencat seperr sot ñeñt̃ cha yoncota'ten ñaña atto seyonllocme'chenpa' o'ch alla ahuamencat seperr selloquẽm̃.

¹³ E'ñepa'ch cohuen es sorrtatyen allochñapa'

ñerra'm esesha' ama e'ñeye' huomencaye' penaye pueyoçher Yomporecop, sañapa' amach aña sorrateno ñeñtcha' a'puerrataterrahuet. Añcha'ña sorrateneññañ ñeñtcha' e'ñe cohuen yenpuene'. Ñeñtpa' atetcha' netma'ntatasa ñerra'mrrate' sapa' añ se'nen toñ ñeñt atarr cohuen paçharr sets muepñarero allcha' e'ñe cohuen sechope'chen. Allochñapa' ñerra'm eseshas checa'repuets amach cha sepofo'tatse'tnomo amach cha sa'tserrpa'nmo attochña e'ñe cohuen sechope'chnom e'ñe huomenc.

¹⁴ Añepa'chña sema'yoçhrena attoch e'ñe cohuen samo'tstannena, e'ñech muechet seyçhena epas allohuen samo'tseshaçhno. Ñaña añcha'ña soctape'chyen ñeñt e'ñe cohuenare' enten Parets. Tarro'mar ñerra'm añ ama yoctape'cheno ñeñt cohuenare' enten Paretspa' amach errotenoç yentereña Yompor. ¹⁵ Ñaña señoanna'tnomuepa'ch, ñato' eseshaspa' ama aye' e'nenno Yompor ñeñtcha' yenpue'. Ñaña señoanna'tepa'ch ñato'tña ama't e'ñe mameshapa' sorratena'ña attoch se'moñe'tanna'ta. Ñerra'm atet sepenapa' acofo'teñpa' o'ch e'ñe epa'huapa' çhach orrtatan atsrre'moçhen. Attoña ñerra'm shonte' acheñenesa'pa' çhach a'sosyatuanet; ñeñtpa' ama pocteye' enteñe Parets. Ñeñtpa' atetcha' netma'ntacha ñerra'mrrate' narmets ñeñt atarr pesherr ye'muen. ¹⁶ Ñaña señoanna'tnomuepa'ch ñato'tña esesha' chetenaya'ña ñeñt ama puetaporeyaye. Amapa' ñato'tña atfa es sepçhampena'ña ñaña ñeñt atarr sherbets Partsocp, ñeñt atet pa ahuaç Esaú.

Ñapa' e'ñe pa'chporrñoṭa pomhuan ñeññ anaret ñocop Partseshot. Ñeññpa' ñeññ o'patacha pompor ñeññ metana'tuene' ñeññcha' allpon apa'nman po'poñ puechemerasha' tarro'mar ñapa' ñeññ e'ñe po'moter pen pompor. Tarraña Esaúpa' ama esoye' enteñe ñeññ anaret ñocop Partseshot ñeñño'mar e'ñe pomhuan ñeññ o'patacha pompor ama't e'ñe parrocha rrachet. ¹⁷ Tarraña e'ñe allponmatapa' yeñoteñ o' alla muenerran ñeññ anaret ñocop Partseshot, tarraña allempopa' amach errotenot alla apuereterro. Ama't pueya'chpeñsha' enamuerreñ allempopa' amate' errotenot a'po'poñeterretoña ñeññ atet o' pohuet ñenmañ.

¹⁸ Ñehua, yeñoteñ ahuat allempo Yomporpa' eñotatan israelena'tarnesha' attoch a'pocatanetañ Parets all aspenṭo Sinaíṭno, ñeññpa' atarr yoroḥen. Allña aspenṭo ñerra'm esesha' ḥapats ama't pa'rrṭapa' allorocmach errottoset all. Ñeññña aspenṭerpa' all huorten tso' ñaña ama macheḥmeto, añcha'noḥtēna, huomenquēshaten. ¹⁹ All e'morrtena ñaña poctor atarr yoroḥen. Atto eñorana'tanet Paretspa' atarr añcha'noḥen enteñet. Ñeñño'marña aḥeñenesha' ñeññ e'mñnotene' atto eñorena Parets, ñetñapa' atet otyenet. “Ñeññepa'ta amach allo'na eñorana'tnenye Parets.” ²⁰ Ama eshcaye' ahuantenaye' enteñeto ñeññ atet otareṭtenet: “Ñerra'm esesha' ḥapats ñeññ aspenṭero ama't pa'rrṭapa' amtsareṭtetepa' — arrolle'tareṭtetepa'ch amapa' enapeḥareṭtetepa' panmeto. Ama't ñaña eyarra muetsetepa'.”

21 Ama't Moiséspa'cho'ña atarr yoro'chen enteñ, ama't ñapa' atet otanet: "Ama't napa' nem'cha'na'teño'pa' cha neyonsHEMA'ten."

22 Tarraña sapa' ama sentare aspenet all am'cha'no'chtena Parets. Sapa' aña senterr ñeñt Siónapen ñeñt toma'ntenaya all ye'chena Yompor ñeñt ama arrom'ña'teshayaye. Ñaña aña senterr Jerusalén ñeñt toma'ntenaya Yompor pa'netser ñeñt pue'ntaño'tsen. All'ñapa' shonte' coshame'tam'peña mellaño'teñnesha' shonte' nanac. Ñeñt allpon allo'tsa'yenpa' ama e'ño'tuapahuoyaye. 23 Ñaña sapa' aña senterr allohuen ñeñt puechemerasha' o' perr Parets ñeñt ap'chetsa pame'ñeño'tet ña. Ñetña allohuenetpa' ñeñtet aquell'caretet pa'so'ch'ñe'chno Yompor pue'ntaño. Ñaña sa te'pa' o' senter Yompor ñeñt'cha' ye'notaterre' allohueney erra'tsencha' cohuen entyesuerr ñaña erra'tsencha' ama cohuenaye' entyesuerro. Ñaña allo'tsa'yen allohuen acheñenesha' puecamqu'e'ñe'chno ñeñt e'ñe pocte' enten Yompor; ñeñt'ñapa' o' e'ñe etsotatuanet all pue'ntaño. 24 Ñaña te' o' senter ñaña Jesús ñeñt e'ñosets yocop Yomporesho attoch e'ñe cohuen a'poc'attonay etserra. Ñaña o' se'ñoterr'ñañ po'rras ñeñt ashata'rettatsa alloña o' ap'retnare'tterraña yo'ch'ñar. Ñeñt'pa' elloña e'ñe cohuen yenpuerrey. Ñeñt'pa' ama atteyaye ñerra'm Abel po'rras ñeñt ashata'rettatsa ahuat.

25 Ñeñto'mar'ña te'pa' o'ch notas, se'm'ñoterepa'ch Yompor ñeñt se'ñorana'tenaya te'. Tarro'mar ahuat israelena'tarnesha' ñeñt ama e'm'ñotaye'te

Yompor allempo eñorana'tanete't arr patsro, ñetñapa' ama eseshaye' queshp̄atso. Ñeñto'marña yeñoteñ ñerra'm yapa' amach ye'mñotere yaña Yompor ñeñt̄ ye'ñorana'tenaya te' pue'ntañot̄, elloña yapa'cho'ña ama't puesheñarrofeyapa' amach eseshay queshperr̄tso. ²⁶ Ahuat allempo eñorana'tanet aspen̄ot̄, po'ñoññapa' cha pelle'llchatenan pats. Ñaña te'pa' elloña o' alla atet̄ oterrerr̄ Yompor ñeñt̄cha' atet̄ perrerr̄, ñeñt̄pa' atet̄ oten: "Elloña esempohuañen po'pocheño'pa' o'ch alla nepelle'llchatterr̄ pats, tarraña amach ñap̄tayaya pats nepelle'llchatterro, enta'nachña nepelle'llchatterr̄." ²⁷ Ñeñt̄ña po'ñoñer all oten "po'pocheño" ñeñt̄ña yeñotatene' esempohuañenpa' ahuapore'tare'terrach allohuen ñeñt̄ aye'chcataret̄ ñeñt̄ apelle'llchatpo'. Allempopa' añach a'puerr̄tsa ñeñt̄ ama apelle'llchatpahuoyaye. ²⁸ Ñaña atto añcha'tare'tena Yompor, ñeñt̄pa' ama apelle'llchatpahuoyaye. Ñeñto'marña yeparasyoso'chepa'ch Yompor tarro'mar ñeñt̄ o'patatenyapa' ama ahuapore'tpahuoyaye. E'ñe yen'cha'na'teño'tpa' e'ñepa'chña cohuen yesherbeñ Yompor ñeñt̄cha' e'ñe coshatene' ña. ²⁹ Tarro'mar yeñoteñ ñeñt̄ Yeyomporer yepen ñapa' atarr Parets e'ñe atet̄ ñerra'm tso' ñeñt̄ e'nuene' ama't erra'tsena ñeñt̄ ama erro't apen yenteno.

13

Atet̄cha' ye'pa' attoch e'ñe cohuen yocshach

Yompor

1 Atterepa'ch chocma semorrentannena allohuenes atet ñerra'm e'ñe semo'nasheñ sepanna'tuena. 2 Ñaña amach sepsatsto attoch e'ñe cohuen sagaḡ allohuen ama't esesha ñeñt huapyetsa sepacllo. Tarro'mar ama señoanna'tueno; ñato'rraña añ saguën ñeñt mueñen Yompor atet pena po'potantañ ñetpa' añepa't agapuet mellañoñeñ.

3 Ñaña chocmuepa'chña seyerepya ñeñt ayottañpsareḡetyetsa. E'ñech cohuen sellcapretenanet atet ñerra'mrrate' sapa'cho'ña ayottañpsareḡes e'ñe parro. Ñaña ñeñt amueroçhtatareḡetyetsa e'ñepa'ch cohuen sellcapretenanet ñamet tarro'mar sapa'cho'ña señoñeñ attecma errotenopa' chocmach semueroçhtena saña e'ñe sechtso.

4 Ñaña o'ch notas po'poñ: Allohuenes ñerra'm esempo sesna'tena o' e'ñe seyorranna'ta epas setapor e'ñepa'ch cohuen sentña ñeñt atto seyorrannena. Ama't parrochapa' amuepa'chña se'namḡsanna'tatsto. Yacmapa' amach chetatstano coyanesha' ñeñt ama puetaporeyaye ama't e'ñe parrocha. Coyanesha'pa'cho'ña amach agapatstanoña ñaña ñeñt ama puerrollareyaye ama't e'ñe parrocha. Tarro'mar Yomporpa' chocmach tsa'taterrana ñeñt chetene' ñeñt ama puetaporeyaye ama't ñaña ñeñt aguëne' ñeñt ama puerrollareyaye.

5 Ñaña te'pa' o'ch noterrser po'poñ: Amuepa'chña añña atarr seye'chapretatsetyesatsto quelle. E'ñepa'chña añña socshena ñeñt e'ñe

allpona sechyen. Tarro'mar Yomporpa' atet oteneý: "Napa' ama't ahuatapa' amach nequechpuerrso, amach na'ypo'ñerrso ama't ahuata." ⁶ Ñeñto'marña yeyemteñoť Yompor e'ñech yocsheñeshoť chocmuepa'ch atet yoten:

Yomporpa' ñeñtña yeyenpuene' ñeñto'marña amach es yemcha'tatsto. Ama't erroťuanen muene' peney po'potantañ Yomporpa' ñach yecuañpene'.

⁷ Ñaña seýerpueñoť chocmuepa'ch cohuen senteñ ñeñt a'potene' Yompor po'ñoñ socop, ñeñtcha' señoťatnomue' cohuen. Ñaña o'ch soctape'ch ñeñt atarr cohuenare' orrtatyesnomuet sesho, atto ñetpa' e'ñe cohuen yemteñet Yompor, sapa'cho'ña atetcha' sepa sama yemtenaya Yompor e'ñe cohuen.

⁸ Jesucristo ñapa' atterach yeyemteña ama't ahuatoteñ, ama't teme'ttsen, ama't ñaña errponañohuen ñeñtach attera ayemuetpotena.

⁹ Ñeñto'marña amach seyemtatstoña ñeñt po'poñechno yeçhateñets ñeñt ama atteýe' ayçhatareťeso ahuañmo'choťeñ. Tarro'mar añña poctetsa o'ch huomenc yepa' yeyoçher e'ñe Yompor puemorrenteñoťey atto atarr yenpueney e'ñe atfa. Ama añoťeye' huomenc yepenoña yeyoçher atto es yerra'yen amapa' atto es yetore'tyena. Tarro'mar ñeñt coťene' añ yeçhateñets rreñtsocpa'na, ñeñt yeçhateñtsorpa' ama yenpuenaneto attoch huomenc pa'nmuet pueyoçher Yomporecop.

¹⁰⁻¹¹ Ñehua, yeñoteñ ñeñt corneshatets judioneshacop ñerra'm esempo muetsenet eyarra

all altaro ñeñt̃ po'chñarecpuet, ñeñt̃ña eyarra po'rraspa' ñeñt̃pa' o'ch anem̃ cornesha' e'ñe allohuanen Parets po'ponro ñeñt̃ ochñartsocpatets. Tarraña ñeñt̃ña eyarra po'chetspa' amach esesha' rrenaye. Ñeñt̃ña po'chetspa' o'ch anmet a'yo all ama acheñempañooyaye, allcha' chamoset. Tarraña te'ña yocop ñeñt̃ amtsarettertsa yo'chñarecop ñeñt̃pa' Cristo. Yapa' ñeñt̃ po'ñoñ pocrram̃ pen yecamquẽñ allohueney ñeñtey yemtenaya ña. Tarraña ñeñt̃ attera corneshatets judionesha' poctaṽñacop all po'prahuo peñet, ñetpa' amach errotenoṽ pocrram̃ petoña Cristo.

¹² Ñaña atto anenan judionesha' eyarra po'chets a'yo all ama acheñempañooyaye, ñeñt̃pa' añ toma'ntena atto Cristopa'cho'ña anmet a'yo all ama acheñempañooyaye allcha' e'ñe puemuerochtateñoṽtetpa' o'ch rroma. Attoña e'ñe ña po'rroso a'cohuentaterrey Partsocop.

¹³ Ñeñto'marña te'pa' e'ñepa'chña yesuanom ñeñt̃ ahuaṽ yoctaṽña ñeñt̃ara ñeñt̃ ya'netser yepenpa' o'ch ahuey a'yo allo'tsen Jesús. Allcha'ña yemuerochtapretosya yaña all atarr otnare'tyeñet.

¹⁴ Tarro'mar añe patserpa' ama añeyaye ñeñt̃ po'ñoch ya'netser yepen tarro'mar ñeñt̃pa' huañerrcha'. Yapa' añña ye'nen ñeñt̃cha' ya'netser yeperr ñeñt̃cha' yenterr Yompor pue'ntaño ñeñt̃ ama ahuañaño ama't e'ñe errponaña.

¹⁵ E'ñe yeyemteñoṽ Jesucristo chocmuepa'chña ya'ye'chochtateññañ Yompor. Atto chocma ya'ye'chochtateññañ ñeñt̃pa' añ toma'ntena ñeñt̃cha' yapueñ Yompor atet̃ pete't̃ ahuaṽ o'ch muetset eyarra ñocop.

E'ñepa'chña ya yenamot ya'ye'chochtateññañ pa'so'cheñ attochña e'ñech yocshateñ. ¹⁶ Ñaña chocmuepa'chña e'ñe cohuen seyenpannañaña e'ñech cohuen sa'muerañtena. Tarro'mar te'pa' ñeñña atto es yapueñ Yompor ñeñcha' atarr coshatene' ña.

¹⁷ Ñaña ñeññ sa'mcha'tareternesha' sepa'yenpa' chocmuepa'chña same'ñenanet, tarro'mar ñetpa' añecop anarettenet ñetcha' cohuanpenet secamquëñ Yomporecop. Ñaña Yomporpa' eñotatuerranetcha' ñeññ atet pa'yenet, ñato' e'ñete' cohuen cohuanpenset ñato'pa' amate' cohuenaye' cohuanpenseto. Ñeñto'marña socoppa' añ poctetsa e'ñechña cohuen same'ñenanet attochña ñetpa' e'ñech pocsheñeshocmañen torrenet socop. Amuepa'ch cha sellcatatstenaneto tarro'mar ñerra'm atetpa' amach errotenot coshaterrsetoña saña.

¹⁸ Ñaña te'pa' o'ch notas, chocmach sema'yochampenya. Yapa' yeñotena yeyochro ama eñalle attoch po'poñ yentannena. Yapa' añña yemnen chocmach yorrtatyen ñeññ atarr cohuen enten Yompor. ¹⁹ Ellopa' o'ch alla noterr serr chocmach sema'yocham pesna allochña'pa' amach atarr atomatatstopa' o'ch alla necherrerr sesho.

Arrpa' all so'tnerranet po'cartot

²⁰⁻²¹ Te'ñapa' Yomporepa'chña e'ñe ahuamencat sepene' ama't allohuen pa'namenacop ñeññ atarr sherbets ñocop. E'ñe yame'ñeñoñ Puechemer ñeññ Jesucristo ñachña ya'cohuentatene'ña ora yocta'ña ñeññ atet yoctape'chyen yeyochro allochña'pa' attochña e'ñe cohuen yoctape'cherr

ora allohuen ñeñt̃ cohuen enten ña. Attochña e'ñech cohuenare' sorratyen ñeñt̃ e'ñe atet̃ muenen ña. Ñeñt̃pa' ñeñt̃ara Yompor ñeñt̃ e'ñe yocshatene' yeyochro ñaña ñeñt̃ara ñeñt̃ tantaterre' Puechemer rromot̃ ñeñt̃ Yepartseshar yepen, Jesucristo ñeñt̃ña atarr cohuen yecuañpene' atet̃ ñerra'mrrate' ñeñt̃ atarr cohuen cohuañpene' po'carrneror. E'ñe po'rrasoña alloña a'pocatonay ñeñt̃ e'ñe etserra ñeñt̃ña a'pocateñetspa' ama't errponañapa' amach huañerro. Te'ña e'ñe tayoteñpa' yecohuentatoñepa'ch Cristo ama't errponohuañen. Ñeñt̃pa' attetepa'ch Nompore yocop.

²² E'ñe allohuanen masheñneshacha' ñaña nochaneshacha' o'ch alla noterrser, e'ñepa'ch cohuen se'mñoton neñoñ ñeñt̃ allpon o' alla noctape'chaterres tarro'mar ama atonaye' ñoñets nequellquënnaso. ²³ Ñaña o'ch neñotatas masheñ Timoteopa' o' alla a'rroyeret. Ñerra'm ahuencha' chap arrpa' epsheño'mareypa' o'ch ahuey o'ch yemo'tensa'.

²⁴ Ñaña napa' nemnen o'ch nehuom̃cha'ch necartot̃ allohuen ñeñt̃ sa'm̃cha'tareternesha' sepa'yen, ñaña allohuen masheñneshachno ñeñt̃ pueyochresha' pen Parets all sesho. Ñaña italio'marnesha' ñeñt̃ ame'ñetsapa' ñetpa'cho'ña mueneñet o'ch huom̃cha'taset ñamet añ necartot̃.

²⁵ Te'ñapa' Yomporepa'ch sa'nataya allohuenes. Ñeñfach notas, ñeñt̃pa' attetepa'ch Nompore. Allohua.

**Yompōr Po'ñoñ ñeññ attō Yepartseshar
Jesuscristo e'ñe etserra a'pōctaterrnay
Yompōresho
New Testament in Yanasha' (PE:ame:Yanasha')**

copyright © 2008 Wycliffe Bible Translators, Inc.

Language: Yanasha'

Translation by: Wycliffe Bible Translators, Inc.

Yanasha'[ame], Peru

Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Yanasha'

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 21 Feb 2024 from source files dated 29 Jan 2022

fa985bb4-fad0-5968-9ee4-626b89cba24f